

Pauro keba peba owera ie Iesu urubia aboto Korini ato na-irowomidirotiti

¹ Mo masiro Pauro ie, nedi peba titi owera ro neitiro ro nisioidiro-rido nimo ata kimibiria niamasositeni mutu. Mo Godi ro simara ubi ato kebase nohodowa, Iesu ro kotiodorai dubu to ararasoro ri.

² Nio Iesu patu urubia Korini sabowa ato na-orowomidiro, nio aboto nisioidiro nedi peba titi owera ro. Nio Godi ro Iesu Keriso aboto ta-gidabuai, ibose nio imese Godi ro ta-giapoi tarena urubia to ararasoro ri.

Erere duriomoro ato na-orowomidiro Iesu aboto na-iraratorotiti-dumo, nou ro ibose nedi atu sosoro tanaro ro nou gisioidiro neio aboto. Iesu neio Abera Naramu e, ibose nimo Abera Naramu e.

³ Nimo Abera Godi, Abera Naramu Iesu Keriso mutu, neitiro aboudo wisa tato kiwarebai, muro mutu nio abato ba-miamotiti.

Pauro eso owera ie Godi aboto

⁴ Nio sapuwo to mo ro eso owera ti-niarotiti Godi aboto, mabu nu edi wisa tato nirimagare ro nio aboto ta-gaiwai-ro, nio Iesu Keriso ro na-gidabuai.

⁵ Nio nou ro modobo ta-iwaititi imese tanaro kisioidiro sapuwo to, idaibo Godi edi owera ro erere mino to imowauti ri, ibose auna umoro iworohuti ri.

⁶ Nedi tanaro ro nio ro na-isioidiro-dumo, paea se iwawuti-dumo ibo nio mo ro na-nimowautiti Iesu sapuwo to io morobise owerai ie.

⁷ Ina noudo ie nimo Abera Naramu Iesu korowameai tau ato nio auna kamade mutu na-emasebidiro-dumo, Tarena Urío ro nio kaokao se modobo tiwaititi-die erere meamea tanaro kisioidiro aboto, ata tanaro ata aseperai pua.

⁸ Nio Abera Naramu ro pupuwo ama-iwaititi-ri. Ina noudo ie Iesu edi tau ato namadi-orowameai-ri, ubauba tato se ama-orowotoi-ri Abera Godi sosoro gabo ato.

⁹ Mabu Godi ro beda owerai kutura ra nou ro tanaro aise kisioidiro ie. Nio Godi ro ta-gihoduti nou mere Iesu aboto idabuti ri. Nu nimo Abera Naramu e.

Iesu urubia karapeputi modobo pua

¹⁰ Mo niramio, nio mo ro binio to a-nimadowerai Abera Naramu Iesu edi pupuwo ro neito, nio karapeputi modobo pua erere patu kisioidiro aboto. Nio modobo ie tanaro kaupoti ubi ato kisioidiro.

¹¹ Mo niramio, urubia orobo masiro Korowe nou moto urubia arua neito na-gou-rimo, neio ro nemowapotai-rimo ibo nio nakara se teremaruti-dumo.

¹² Owerai mo ro ibo nirowidiro ata dubu ibo kutura ie, 'Mo Pauro nowasoro.' Ina ata ro ibo, 'Mo Aporosi nowasoro.' Ina ata ro ibo, 'Mo Pita nowasoro.' Ina ata ro ibo, 'Mo Keriso nowasoro.'

¹³ Keriso urubia nio kaupoti durupi sosoro ie, ina nio ubi ra Iesu durupi kapeputi aboto, a? Nio sapuwo to mo a-nemopoguti-rimo ra? E e! Nio obo to edi tau ato na-giwarumiauti-rimo, nio

mo do to nato a-gararapoi-rimo ra? E e! Marasio ia ie imese!

¹⁴ Mo eso owera Godi aboto ti-niarotiti mabu nio ata mo ro obo to owarumia pua, Kirisipasi se nowarumia Gaiasi mutu.

¹⁵ Ina noudo ie ata ro morobise to utura-ri pua ibo, mo Pauro ro nowarumia obo to ina mo nou do to aise nararapoi.

¹⁶ Nu morobise ie mo ro Sitipani moto urubia se niwarumiauti, etu umoro ra arua pua ie.

¹⁷ Mabu mo Keriso ro na-notiodorai-ro, ibo pua urubia mo ro obo to kiwarumiauti ubi ato kotiodorai. Kaupoti mo nou ro a-notiodorai-ro urubia mea owera imowauti ri nou ia sapuwo to. Mo ro duriomoro muro to kimowauti rasiri ie, Iesu ota kemowotowa ato beda sosoro gemopoguti-rimo, mo edi owera ro urubia niro turi ato pupuwo se araremuti-ri pua.

Godi muro, urubia muro, erere se iamo-ma

¹⁸ Urubia etio ra era paruo na-emou-dumo, neio ibo imaragoidirotiti-dumo, Iesu ota kemowotowa ato na-gemopoguti-rimo nou sapuwo to, dorogara se kimaragoidiro tato owera ie. Kaupoti nimo etio ra Godi ro na-niapopo-die, nimo umoro ie Godi edi pupuwo ro nedi owera ro nato towamo, urubia neito kiapopo aboto.

¹⁹ Mabu Tarena Buka ato Godi ro kebase nedi owera ro ta-garo, *Arua urubia simara sapuwo to ibo timaragoidirotiti-dumo, 'Nimo mea muro urubia ie', kaupoti urubia mo ro umoro anama-iwaititi-ri ibo neio mea muro urubia pua, kimaragoidiro tato urubia ie. Ibose neio ro owera*

to beda gabo kisioidiro ra, neio gabo mo ro kimoputi ie.

²⁰ Nedi tau ro nato urubia na-orowomidiro, Mose sabi keremoputi urubia, ibose awawo kimaragoidiro urubia neio sapuwo to ower a beda sosoro ra? Duriomoro muro edi na urubia ro na-iworohuti-dumo, neio edi muro ro Godi ro imese kimaragoidiro tato ta-gimowai.

²¹ Godi edi muro ro neido neio gabo nou ro imese ta-gimopai, nedi urubia ro neio simara muro to nou aboto orowateai-ri pua. Duriomoro urubia ro nedi ower a ro Iesu sapuwo to kimaragoidiro tato ower a to asorotiti-dumo, kaupoti Godi ro simara ubi ato gabo ibo gosioidiro-ro, nedi ower a ro etio ro imibiria-dumo, neio neito iapopo rie.

²² Iu urubia ubi ie pupuwo korosa tanaro kiauri, ina neio nato imibiria rie ibo nedi ower a ro morobise ie. Isana Iu ower a karo tato urubia beda ower a ra duriomoro urubia ro mea muro ower a to na-wasoro-dumo, io neio ubi ie nou kirowidiro.

²³ Kaupoti Iesu ota kemowotowa ato na-gemopoguti-rimo, neibi ia ro urubia nou sapuwo to nimowautiti-bimo. Nedi ower a ro Iu urubia aboto auna ota sesere sosoro ie, neio ro kemasaudai modobo pua. Ibose nedi ower a ro Iu ower a karo tato urubia ro kimaragoidiro tato ower a to asorotiti-dumo.

²⁴ Kaupoti Godi ro arua urubia ta-girapoi, arua Iu urubia aboudo ie, ina arua Iu ower a karo tato urubia aboudo ie. Nedi urubia ro umoro ta-go-rimo ibo Godi edi pupuwo ro ina nu edi mea muro ro, Iesu abato se iamotiti.

²⁵ Arua urubia ro ibo iarotiti-dumo nedi owera ro Iesu na-gemopoguti-rimo nou sapuwo to kimaragoidiro tato owera ie. Kaupoti Godi edi mea muro gabo ro io nouse ie, idaibo sosoro muro urubia abato iamo pua.

Ina arua urubia ro ibo iarotiti-dumo, Iesu ota kemowotowa ato na-gemopoguti-rimo ata pupuwo tato tanaro ie, urubia ubauba aboudo kiapopo aboto. Kaupoti Godi edi pupuwo ro neito urubia ubauba aboudo kiapopo ie, idaibo sosoro pupuwo, urubia abato iamo pua.

Godi ro dorogora se urubia girapoi

²⁶ Niramio ma-deremaragoidiro-mo, nio Godi ro edi tau ato na-girapoi-ro nio beda sosoro urubia ra? Nio sirio se duriomoro urubia ro mea muro kimaragoidiro urubia to iasorotiti pua. Ina masiro mutu urubia nio abato sipu ro orowomidiro pua. Ibose nio edi abeamio ro nasaio mutu neio sirio se awawo masiro irobidirotiti pua.

²⁷ Kaupoti edi urubia ro duriomoro urubia ro kimaragoidiro tato urubia to na-iasorotiti-mo, neio Godi ro ta-girapoi-ro. Nou ro nedi tanaro ro nou ri gosoidiro muro kimaragoidiro urubia siripo iwai ri. Ina masiro tato urubia Godi ro neio girapoi awawo masiro urubia siripo iwai ri.

²⁸ Ibose Godi ro dorogara se urubia, duriomoro urubia ro sopu to na-iauri-dumo, neio Godi ro ta-giapoi, nou ro nedi tanaro ro nou ri gisoidiro awawo urubia sopu ia to iwororuwo rie.

²⁹ Ina noudo ie ata dubu ata ro Godi sosoro gabo ato keremowabu modobo pua, ata gabo tato ie.

³⁰ Kaupoti nio Godi ia ro ta-gidabuai Iesu Keriso aboto, Godi edi mea muro gabo ro nimo kiapopo aboto Iesu Keriso nouse ie. Iesu ro nimo mea tuputupu urubia to niapoi-ro, ina ibose nimo tarena urubia to niapoi-ro. Ibose Iesu nouse ie nimo ubauba aboudo kiapopo dubu.

³¹ Mabu Tarena Buka ato oweru ibo tiamo, *Ina noudo ie ata dubu ata ubi na-iamo keremowabu aboto, Abera Naramu ro edi tanaro ro gisioidiro, nou sapuwo to kemowabu modobo ie.*

2

Mea oweru Iesu sapuwo to mea gabo nou e

¹ Niramio, mo ia kebase nio aboto na-nou, Godi edi gabo ro piro se na-owamotiti nio nou imowapotai rie. Nio mo ro na-nimowautiti, ibo pua duriomoro muro to kimowauti, ibose nio mo ro oweru to iageawado pua.

² E e ibo pua. Mo ubi kebase ta-niedea Iesu Keriso na-gemopoguti-rimo ota kemowotowa ato, nio nou sapuwo to se imowauti rie.

³ Mo nio aboto na-nou, mo ta-neremasibai durupi imese pupuwo tato ia se gowamo, ibose mo durupi aise gomuguguti. Mo tere kimaragoidiro ta-niworohutiti, ibo etu umoro ra modobo pua mo ro mea se kimowauti.

⁴ Nio mo ro edi mea oweru ro na-nimowautiti ibo pua duriomoro muro to kitomu, ibose oweru meamea to kiageawado. Mo ro edi mea oweru ro na-nimowautiti, Tarena Urío ro pupuwo to

iwapotaidiro-titi-ro, ibo nedi owera ro morobise ie.

⁵ Mo ro nedi tanaro ro nou ri nisioidiro, nio edi kimibiria ro na-iworohuti-dumo duriomoro muro rido iroromai-ri pua, Godi edi pupuwo ro noudo iroromai rie.

Godi edi muro ro Tarena Urio ro iaiwotiti-die

⁶ Neibi etio ra mea owera Iesu sapuwo to urubia na-nimowautiti-bimo, neibi ro nio mea muro to nimowautiti-bimo. Etio ra kimibiria mutu modobo na-goititi-rimo, neibi ro nedi mea muro owera ro neio aboto se niwautiti-bimo. Nedi mea muro ro sopu duriomoro awawo urubia aboudo ou pua. Nedi urubia ro saiki ata masiro amadimo-ororoporeawado-ri.

⁷ Kaupoti Godi edi mea muro gabo ro, piro se na-owamotiti-ro, neibi ro nou nowapotaidiro-titi-bimo. Duriomoro ido to gosioidiro Godi ro, nedi mea muro gabo ro kebase ta-gosioidiro, nimo ro awawo masiro irobidiro ri Adiri sabowa ato.

⁸ Duriomoro awawo urubia ro nedi mea muro ro neio ro eibimai pua. Neio ro keibimai rasiri ie, auna ia pupuwo Abera Naramu neio ro ota kemowotowa ato emopoguti-ri pua.

⁹ Idaibo sosoro owera Tarena Buka ato tiamo, *Godi nirimagare etio ro emati-dumo, beda tanaro ra nou ro na-gimohodowa neio imasogoro-die. Ata dubu ata ro simara idomari to owea pua, ina ata dubu ata ro simara gare to emewidiro pua, ina ibose ata dubu ata ro simara kimaragoidiro to owea pua.*

¹⁰ Kaupoti nedi tanaro ro Abera Godi ro nimo aboto Tarena Urio to giwapotaidiro-ro. Tarena

Urio umoro ie imese sirio tanaro, Godi maumo ia kimaragoidiro mutu nu umoro ie.

¹¹ Urubia dubu abato beda kimaragoidiro ro iamo, ata dubu ata umoro oi-ri pua, nou simara durupi urio nou ro koi ie umoro. Ina ibose Godi abato beda kimaragoidiro ro iamo, ata dubu ata ro umoro oi-ri pua, Tarena Urio nou se ie nou nakara umoro ie.

¹² Duriomoro kimaragoidiro Godi ro emeiriai pua nimo aboto, kaupoti Tarena Urio gemeiriai-ro nimo aboto, nimo umoro oititi ri ibo Godi ro nedi tanaro ro wisa tato se iaiwotiti-die nimo aboto.

¹³ Nedi tanaro ro neibi ro nio nou sapuwo to nimowautiti-bimo. Neibi ro nedi kimowauti oweru ro duriomoro muro urubia aboudo iratamudiro titi pua, Tarena Urio ro nitamudiro titi-biro. Tarena Urio etio abato imidiro titi, nou edi kitamudiro oweru ro neio neito nitamudiro titi-bimo.

¹⁴ Etio ra Godi edi Tarena Urio ro neio abato omidiro tato, nou edi kitamudiro oweru ro neio ro ibeiouti-dumo. Mabu Tarena Urio edi kitamudiro oweru ro neio ro kimaragoidiro tato oweru to iasorotiti-dumo. Ina noudo ie neio ro modobo pua maumo mea se komidai aboto. Mabu Tarena Urio ro se kiwaititi ie urubia umoro, nou edi kitamudiro oweru ro mea se kimeiouiti aboto.

¹⁵ Kaupoti etio ra Tarena Urio ro na-iworohuti, neio ro imese tanaro mea mino to kimeouti ie ibo meana boira o ubauba boira. Ina neio ata dubu ata ro kituputi modobo pua.

¹⁶ Idaibo sosoro oweru Tarena Buka ato tiamo, *Abera Naramu edi kimaragoidiro sirio ro, ata*

dubu ata ro umoro koi ra? Abera Naramu ata dubu ata ro kotomudiro modobo ra?

Kaupoti Iesu Keriso ro beda sosoro kimaragoidiro iworohutiti, nimo ia ro idaibo sosoro kimaragoidiro nou niworohuti-dumo.

3

Nio urio iroromai pua

¹ Niramio mo ia nio mutu kebase na-nimidirotiti, nio kimibiria mutu modobomodobo oititi pua. Ina noudo ie mo ro oweri beda sosoro karo ra urubia aboto Tarena Urio ro na-iworohutiti, idaibo oweri nio aboto mo ro karo modobo pua. Nio ro durupi ubi tanaro auna se isioidirotiti-dumo, kimibiria mutu iroromawado pua.

² Nio ro kebase Iesu na-owasorotiti-mo nio bamuai kainakaina sosoro ie, ina mo nio mamu sosoro ie. Nio mo ro edi kitamudiro to na-nitamudirotiti, bamuai kainakaina beda sosoro ra mamio ro nono kimio, nio idaibo sosoro nitomutiti. Mabu nio ro koko ohona kiho modobo pua. Nio abora iroromai pua, atu sosoro irowomidiro, koko ohona kiho modobo pua.

³ Nio durupi ubauba ubi tanaro aise isioidirotiti-dumo. Mabu nio masawe na-irereaurititi-dumo, nio ro sopu duriomoro urubia tanaro aise isioidiro ri ra?

⁴ Nio ata ro kutura ie, 'Mo Pauro nobodoro.' Ina ata ro kutura ie, 'Mo Aporosi nobodoro.' Nio sopu duriomoro kimaragoidiro a-iworohuti-dumo ra?

⁵ Abora mo ubi ie nio kimaragoidiro kimodobura aboto, ibo neitiro beda sosoro dubu teibo ra? Neitiro dorogora se dubu teibo ie, Godi

sowake dubu teibo ie. Nou sowake na-nirohotiti-do, nio kimibiria neitiro aboudo gimidai-rimo. Neitiro Abera Naramu ro erere woko ta-nimia-marō.

⁶ Ota mo ia ro nibouti, ina Aporosi ro obo to imawirititi. Kaupoti Godi nakara se nou se ie iedi ota ro kiwoubua, kiroromai sapuwo to.

⁷ Ina noudo ie etu ro kibouti ra, ibose obo to etu ro kimawiriti ra, io neitiro auna dubu teibo pua. Godi nakara se nou se ie nu auna ia ie, ota nou ro iwoubuatiti.

⁸ Ota etu ro kibouti ra, ina obo to etu ro kimawiriti ra, neitiro ro nedi woko ro kaupoti ubi ato kisioidiro ie. Ina neitiro nedi erere woko ro nou sapuwo to Godi ro wisa kimio-ma ie.

⁹ Neitiro Godi woko dubu teibo ie, atu se nemesioidiro-do. Nio Godi pari sosoro ie, ibose nio nou moto sosoro ie.

Godi moto mea se kemidi modobo ie

¹⁰ Mo Godi ro wisa tato nowarebai-ro nu moto mea siware mutu mo ro na-nemidi. Mo ro kebase turimida posi nowotobowa, iato arua urubia ro gou-rimo moto neio ro ididi-dumo. Kaupoti nedi kididi urubia ro neio ro modobo ie simara woko erere se kimeiouiti.

¹¹ Mabu ata gabo owamo pua ata dubu ro ata turimida posi ata kowotobowa aboto. Kaupoti namabu, Iesu nouse ie mo ro nedi turimida posi ro na-nowotobowa.

¹² Kaupoti moto kididi namabu kididi urubia ro na-iaremuti-dumo moto ato, neio atu sosoro pua. Arua neio koko ota iaremuti-dumo idaibo kutika, kawoia sesere, siawiri moto neito

ididi-dumo. Ina arua neio gorodo ota, bagara neito irimari-dumo.

¹³ Kaupoti nimo Iesu ro koto edi tau ato nama-iwai-ri, nimo erere se moto keremari woko na-nisioidiro-dumo, neio ro paea se nato amadimi-iwapotaidiro-ri. Mabu erere moto keremari woko nedi koto saiki ro nato paea se amadimo-orowapotaidiro-ri.

¹⁴ Moto koko se etio ro irimari-dumo, neio woko era ro iho-ri pua. Ina neio Godi ro nou sapuwo to mea wisa ama-imio-ri.

¹⁵ Etio ro geremari-rimo gorodo ota to ina bagara to, neio woko ibose era to ama-iwaibirio-ri. Kaupoti neio woko era ro aise ama-ipisiamuti-ri. Nedi urubia ro neio Godi ro ubauba aboudo amadi-iapopo-ri sekere, kaupoti neio wisa Godi ro imio-ri pua. Nu idaibo sosoro ie nedi urubia ro neio moto era ro nama-iho-ri, ata dubu ro neio hio ito amadi-iwosuwoduti-ri keremiro kiwia sapuwo to. Kaupoti neio namabu sirio aise amadimi-imeserai-ri, era ro ama-iho-ri.

¹⁶ Ina nio keba se umoro ta-goi-rimo ibo Godi edi tarena moto ro nio nou se ie, ina Tarena Urio nio abato timidirotiti.

¹⁷ Godi edi tarena moto ro ubauba etio ro owaititi-dumo, io neio ia ama-iwai-ri Godi ro ubauba. Mabu Godi edi tarena moto ro tarena ia ie, ina nio nou se ie.

Kiwaboi urubia sapuwo to keremowabu modobo pua

¹⁸ Nio modobo pua nakara se na-warasaubuti-dumo. Duriomoro urubia ro kiauri maumo ato, nio ibo

na-imaragoidiro-titi-dumo nio mea muro urubia ie. Tauo keba se nio duriomoro urubia ro kawakawa urubia to kiasoro modobo ie, nio Godi sosoro gabo ato mea muro urubia to ararasoro ri.

¹⁹ Mabu duriomoro urubia ro edi tanaro ro na-isioidiro-titi-dumo mea muro tanaro to iasorotiti-dumo, ina Godi sosoro gabo ato imese kimaragoidiro tato tanaro ie. Ina mo ro beda owera naro, idaibo sosoro owera tiamo Tarena Buka ato, *Nedi duriomoro muro kimaragoidiro urubia ro neio ro beda gabo isioidiro-dumo, neio gabo Godi ro kiwasiouti ie.*

²⁰ Ina Tarena Buka ato ata owera ibose towamo, *Abera Naramu auna umoro ie duriomoro kimaragoidiro urubia beda sosoro kimaragoidiro mutu irohotiti-dumo. Neio edi ubi tanaro ro aise ororosioi-di-ro-pua.*

²¹ Ina noudo ie, nio ro modobo pua kiwaboi urubia kimowabu. Godi ro imese tanaro patu nio ta-gimesioi-di-ro.

²² Nio Godi owera kitamudi-ro urubia ta-gimohodowa idaibo Aporosi, Pita, ina mo ia, neibi nio kiwarebai urubia ie. Godi ro imese namabu na-gisioi-di-ro, nio meana sapuwo to gisioi-di-ro. Abora korowomidi-ro keremiro sapuwo to, korowaburo saro gabo ato beda mino to ama-orowomidi-ro-ri, nedi tanaro sirio ro nio meana sapuwo to ie. Mabu imese tanaro abora na-ororosioi-di-ro-dumo, kimibiria urubia nio kiwarebai sapuwo to ie. Ibose keba moro ato etou tanaro ro amadimo-ororosioi-di-ro-ri, Godi ro nio kiwarebai sapuwo to ie. Mo ro nedi owera ro dese to na-niatiti io morobise owera ie,

amadimo-ororosioi diro-ri.

²³ Ibose nio ia Iesu Keriso urubia ie, ina Iesu Keriso Godi do ie.

4

Abera Naramu simara woko urubia nou ia ro kimeiyoti

¹ Ina nou do ie, neibi nio ro Keriso sowake urubia to diasoro-ibirimo. Kebase Godi edi maumo ia kimaragoidiro ro piro se nou owamotiti, abora urubia neibi ro neito nimowauti-bimo. Godi ro nedi woko ro neibi aboto nou gaiwai-ro.

² Woko kemeauri dubu ro woko komidai ato eputa dubu aboudo, nou ro modobo ie eputa dubu ubi tanaro mea se kosioidiro.

³ Ina mo sapuwo to, mo ro Godi woko mea se a-nemesioidiro ra? Mo woko mutu nio ro na-nemeiyoti-dumo, mo ro auna se imaragoidiro-ri pua. Ibose mo urubia ro na-nemeiyoti-dumo, mo ro auna se imaragoidiro-ri pua. Ina mo nakara se keremeiyoti pua.

⁴ Mo niro turi modobo ato owamotiti. Mo kimaragoidiro owamo ibo Godi ro edi woko ro mo na-nomia-ro mea se nemesioidirotiti. Kaupoti nou morobise ra? Godi woko mo ro mea se a-nemesioidiro ra? O ubauba se a-nemesioidiro ra? Abera Naramu nou se ie mo nou ro anama-emeiyoti-ri.

⁵ Ina nou rie modobo pua urubia nio ro kimeiyoti, womu tato Abera Naramu namadi-owameai-ri nou ia ro ama-imeiyoti-ri. Beda ubauba tanaro ra urubia ro duwoduwo maumo ato na-isioidiro-dumo, Abera Naramu ro ama-imaipotawado-ri. Ibose urubia niro turi ato

beda ubauba ubi ro iamo, Abera Naramu ro paea se nato aise ama-iwapotaidiro-ri. Iedi tau ro nato Godi ia ro nimo simara modobo ato kamade owera to nato anama-imowabu-ri.

Korini urubia auna nakara se gorowai-rimo

⁶ Niramio, nedi owera ro mo ro na-niatiti, mo ie Aporosi neitiro sapuwo to ie nio umoro koi sapuwo to, owera urubia ro na-iaro-dumo nou maumo beda sosoro iamo. Nedi owera ro ibo ie, 'Tarena Buka owera beda sosoro iamo ito imasaudu mamu, nou se dibodoro-mo.' Ina noudo ie nio ro modobo pua owera keremowabu mutu karo ibo, 'Nimo kitamudiro dubu meana ia ie. Nio edi kitamudiro dubu ro ubauba ie.'

⁷ Nio imese ata sosoro urubia ie idaibo owera karo ato! Nio ibo a-imaragoidiro-dumo ra nio ia se ie meamea urubia? Nio umoro iamo pua ra ibo, imese meana nio ro na-gimade-rimo Godi aboudo ou-dioumo? Nio dorogora se owera na-iarotiti-dumo, auna keremowabu mutu iarotiti-dumo. Nio awawo urubia to na-wararasorotiti-dumo, nio idaibo nakara se arasaubuti-dumo. Kaupoti nio edi kiwarebai tanaro ro Godi aboudo outiti-dioumo, ina noudo ie modobo pua auna se keremowabu.

⁸ Nio ibo imaragoidiro-dumo imese sirio tanaro Godi sapuwo to nio tau kiamidimai ie. Nio ubi tanaro kisioidiro mutu modobomodobo ta-goititi-rimo, nio ro se irowomidirotiti eputa urubia sosoro, a? Neibi nio ro ta-nirohodorai-bidioumo, nio abora eputa urubia sosoro irowomidiro, a? Nio irasaubutiti-dumo. Nio eputa urubia to

kararasoro rasiri ie, modobo ie, neibi ibose eputa urubia to ba-nararapoi-birimo.

⁹ Kaupoti neibi Iesu ro kitiodorai urubia idaibo sosoro ie, Godi woko etu bi ro nemesioidiro-bimo, neibi eputa urubia sosoro omidiro pua, masiro tato urubia ie. Neibi dibura urubia sosoro ie, saro rido nirohotiti-bimo kiopiauti aboto niwaguwo-ibidumo. Urubia sirio ro ibose Godi sowake urio mutu, neibi neio ro auna se ti-niauri-bidumo, neibi urubia ro ubauba mino to na-niworohutiti-bidumo.

¹⁰ Urubia sirio ibo imaragoidiro-dumo nimo kimaragoidiro tato urubia ie. Mabu neibi ro Keriso sowake nemoworohutiti-bimo. Kaupoti nio bagea to imaragoidiro-dumo ibo nio mea siware kimaragoidiro urubia ie. Iesu ro kitiodorai urubia neibi pupuwo tato urubia ie. Kaupoti nio ro auna keremowabu mutu iaro-dumo ibo, 'Nimo woko Godi edi pupuwo korosa ro nou mutu nisioidiro-dumo.' Nio masiro urubia ro iwoubuatiti-dumo, kaupoti neibi masiro tato urubia to niasorotiti-bidumo.

¹¹ Neibi Iesu ro kitiodorai urubia tuturu tau to sogoi ro niwatiti-bi, obo sogoi ro niwatiti-bi, ibose kerekere namabu niroidirotiti-bimo, urubia ro ubauba mino to niadotiti-bidumo. Neibi simara moto tato ie, duriomoro gabogabo nirohotiti-bimo.

¹² Neibi tu mutu e, ohona ti-neremowahautiti-bimo. Neibi ata dubu ata ro oweru to ubauba kiwai-bi ato, nu wisana neibi ro ibo kemowapotai ie, 'Oro Godi ro korosa ba-mowai!' Neibi arua urubia ro ubauba mino to kiworohuti-bi ato, neibi ro neio wisa imowame-ri pua.

¹³ Neibi masiro urubia ro ubauba na-nimowaititi-bidumo, neio wisana neibi ro mea muro oweru to kimowame ie. Abora morobise ie urubia ro edi momoru ro na-ihere-dumo neibi nou e. Ibose neibi neke nibo ie, urubia ubi tato napeteibi ie. Neibi idaibo sosoro nimidirotiti-bimo.

Pauro ubi ie neio ro nou tanaro kibodoro

¹⁴ Nedi peba titi oweru ro mo ro nisioidiro nio aboto, ibo pua nio siripo kiwai, umoro oweru ie, mabu nio mo merebusere ie, nirimagare ti-nimatiti.

¹⁵ Nio sirio kiauri urubia mutu sekere, Iesu Keriso sapuwo to neio ro iwaboi-dumo. Kaupoti nio siriosirio abeamio tato ie, mo nou se ie nio ia abera kaupoti. Mo nio abera ie mabu mo keba dubu e, mea oweru Iesu sapuwo to nio aboto mo ro nowou-ro.

¹⁶ Ina noudo ie nio mo ro binio to nou ri nimediawado, mo edi kitamudiro ro nio ro nou ibodoro ri.

¹⁷ Mo ro Timoti nio aboto nou ri nemeiriai, nu mo ia mere ie, mo auna natonato ie nou aboto, ibose nou woko mea se isioidirotiti Abera Naramu sapuwo to. Nio Timoti ro ina umoro ama-iwai-ri mo komidiro keremiro beda sosoro nowaboititi, Iesu Keriso gabo na-nobodorotiti. Ina Iesu urubia erere sabowa ato na-niraturiotiti, mo simara komidiro muro beda sosoro ra, nou nitamudiroititi.

¹⁸ Nio arua iato na-orowomidiro idaibo keremowabu oweru to iaro-dumo, 'Pauro imese na ito geremopogati, nimo aboto ina orowameai-ri pua.' Ina noudo ie nio aboto keremowabu auna se owamo maseseau tanaro nou ri isioidiro-dumo.

¹⁹ Kaupoti Abera Naramu ubi koi ato, nio mo ro kiraturioma tau aupise amadi-apimaidiro-ri. Mo umoro nakara se anama-oi-ri ibo, nedi keremowabu urubia ro neio pupuwo korosa mutu ra, o ower a pararaparara dorogora se a-war o-dumo ra? Kaupoti neio edi pupuwo ro boido iwaititi-dumo, Tarena Urio aboudo ra o boido ra?

²⁰ Mabu Godi edi kiwaboi tanaro ro ibo pua ower a to se karo, tanaro Godi edi pupuwo korosa ro nouto kisioidiro ie. Kaupoti Godi edi pupuwo ro tanaro durupi to neito kisioidiro ie.

²¹ Nedi tanaro ro nou se demaragoidiro-mo, mo Korini sabowa to nama-orowateai-ri, nio mo ro anama-imowotoi-ri, nio kerewesegerai tato mo ro ibo anama-utura-ri, 'Nedi urubia ro neio ubauba imesera i pua.' Ina nio mo ro auna ower a to anama-irobai-ri mea se kerewesegerai sapuwo to. Mo nio aboto kebase orowateai tato, ina nio namadime-erewesegerai-ri, nio mo ro mea kamade ower a to pupuwo neito anama-iwaititi-ri.

5

Abera orobo mutu etu ro orobuti nio soirio rido dowagare-mo

¹ Mo a-niwagogorai arua urubia ro na-nemowapotai-rimo ibo, siripo ia tanaro nio ata ro tisioidiro. Idaibo tanaro Godi umoro tato urubia ro kisioidiro pua. Ata dubu nio soirio ato tomidiro, nu karasomai abera nu edi saro orobo ro nou mutu irobuti-ma.

² Nio a-remowabu-dumo ra nedi ubauba tanaro ro nou sapuwo to? Nio modobo ie idobi

kiroto, kamade tato korowomidiro. Ina nedi dubu ro nio soirio rido aise dowagare-mo, nio mutu aradabu ate.

³ Mabu mo nio mutu omidiro pua sekere, kaupoti mo abato kimibiria towamo ibo mo urio to nio mutu ti-nomidiro. Mo iato komidiro tato, kaupoti mo ro owera kebase ta-nisioidiro ibo, nedi dubu ro ubauba wisa komia sapuwo to.

⁴ Nio atu moro to namadima-aradabuai-ri, ina mo urio to ibose to nama-aradabuai-ri, nimo Abera Naramu Iesu edi pupuwo korosa ro nio abato ama-owamotiti-ri, nedi tanaro ro nou kisioidiro aboto.

⁵ Nio karadabu tau ato, nedi dubu ro nio ro Satani tu to ba-daremo-mo, nu durupi Satani ro temeteme ba-momiotiti. Ina noudo ie Abera Naramu Iesu korowameai tau ato, nimo koto edi tau ato nama-iwaititi-ri, nu edi urio ro Godi ro ubauba aboudo nato amadi-apopo-ri.

⁶ Nio auna se keremowabu idaibo, modobo pua. Nio umoro tato ra ibo kainai isiti, parowa to kiedea ato, parawa sirio aise kiaupai ie. Ina idaibo sosoro ie, kaupoti ubauba tanaro dubu nio abato na-omidiro ubauba mutu, nio Iesu patu urubia imese sirio se nou ro aise kimamuai ie.

⁷ Tagara isiti diwagare-mo, nou pikisa owera ie. Ina noudo ie tagara korowomidiro keremowabu tanaro aise diwagarewado-mo nio aboudo. Ina nio abato ata ubauba ata owamo-ri pua Godi sosoro gabo ato. Nio orio urubia sosoro ama-irowomidiro-ri. Nou mabu ato ie nio kiaupai tato parawa sosoro ie, isiti tato parawa. Nio modobo ie ubauba tato korowomidiro.

⁸ Ina nimo Kimasaudai Soriomu sipisipi dawade, Godi ro kohodowa dubu Iesu nou se ie, nu ta-gopia-rimo nimo ubauba sapuwo to. Nimo ro kimaragoidiro modobo ie Iesu Keriso ro beda tanaro gosioidiro nimo sapuwo to. Nimo ro modobo ie morobise tanaro kisioidiro, ina modobo pua ata dubu ata gabo kemagerai ubauba tanaro kisioidiro aboto.

⁹ Mo ro kebase edi peba titi ro nisioidiro nio mo ro ta-nimowapotai ibo, upo tanaro etio ro isioidiro-dumo, modobo pua nio neio mutu kidabuti.

¹⁰ Mo ibo aro pua kimibiria tato urubia upo tanaro etio ro isioidiro-dumo, namabu sogoi urubia, piro urubia, ibose arua orora kiroru urubia mutu idabuti mamu. Mo ro idaibo oweru to aro pua. Mabu nio ro idaibo tanaro urubia namadimi-imeserai-ri, nedi duriomoro ro nio ro kemeserai kawa amadidime-emeserai-ri.

¹¹ Ina abora mo ro peba titi oweru nou ri nisioidiro nio aboto, urubia ro ibo karo ato, 'Nimo nio kimibiria naminiramio ie,' kaupoti upo tanaro kisioidiro urubia, namabu sogoi urubia, orora aboto korowaro urubia, ubauba oweru karo arua urubia sapuwo to urubia, koko obo kidio urubia, piro tanaro kisioidiro urubia, idaibo karasaubuti kimibiria urubia mutu idabuti mamu, ina ohona neio mutu iho mamu.

¹² Kimibiria tato urubia gomo ato na-oroho-dumo, mo woko pua neio kimeiouiti aboto. Neio Godi ro ama-imeiouiti-ri. Kaupoti kimibiria urubia nio ro kimeiouiti modobo ie.

¹³ Tarena Buka ato idaibo oweru tiamo, *ubauba tanaro edi dubu ro gisioidiro, nio soirio*

rido aise ba-dowagare-mo.

6

Kimibiria dubu ro boinana kimibiria dubu koto aboto owou mamu

¹ Oro aboto boinana kimibiria dubu ro ubauba tanaro ata na-osioidiro-die, oro siripo tato ra nou oro ro na-owou kimibiria tato koto kiauri dubu aboto? Nedi dubu ro modobo ie Godi edi tarena urubia ro neio aboto kowou, koto owera neio ro emewidiro ri.

² Nio umoro tato ra ibo, saiki ata sopu duriomoro urubia koto owera Godi edi tarena urubia ro neio ro amadimi-imewidiro-ri? Ina noudo ie nio kimibiria urubia iato na-orowomidiro, nio aboudo modobo pua ra mibo kainakaina nakara se kiporeawado?

³ Nio umoro iamo pua ra ibo, saiki ata Godi edi sowake urio sirio ro koto owera nimo ro anamadimi-imewidiro-ri? Ina noudo ie nio ro sopu duriomoro tanaro sapuwo to mibo kainakaina na-iaurititi-dumo, nio ro nakara se kiporeawado modobo ie.

⁴ Nio mibo na-iamo borubi kimibiria urubia mutu, neio nio ro modobo pua kimibiria tato koto kiauri urubia aboto kiwou, koto owera imerewidiro ri. Nio Iesu urubia iato na-orowomidiro, nio ro modobo ie dorogora kimibiria urubia kihoduti, mibo kainakaina koto abato kimewidiro aboto.

⁵ Idaibo owera nio aboto na-niatiti, nio mo ro siripo iwai rie. Nio abato kimibiria urubia mea muro kimaragoidiro mutu orowomidiro pua ra? Ina nio mibo patu modobo pua ra neio ro kiporeawado?

⁶ Kaupoti nio ata sosoro orowatititi-dumo, kimibiria naminiramio koto aboto aise kiworoho ie kimibiria tato urubia sosoro gabo ato.

⁷ Nio ro kimibiria naminiramio koto aboto na-iworoho-dumo, nio imese atu se sopu to ta-iroruwo-ro. Nio modobo ra aise kimaria? Nio neio ia ro se miwati-mo, piro tanaro karasaubuti mino to nio aboto misioidiro-mo.

⁸ Kaupoti nedi urubia ro nio ro na-giwapotai-dumo, nio ro ibose atu sosoro tanaro tisioidiro-dumo kimibiria naminiramio aboto!

⁹ Nio umoro tato ra ibo, ubauba tanaro kisioidiro urubia ro Godi edi kiwaboi maumo ro, neio ito odouti-ri pua? Ina noudo ie nio modobo pua nakara se karasaubuti. Idaibo upo tanaro kisioidiro urubia, orora kiroru urubia, mau kereesebo urubia, ata dubu orobo sosoro ie ina ata dubu ro nato koworohuti, ina ata dubu nou ro orobo sosoro dubu na-oworohuti,

¹⁰ namabu piro to kimade urubia, namabu sogoi urubia, koko obo kidio urubia, arua urubia namabu kiwasiti urubia, ubauba owera karo arua urubia sapuwo to, nedi tanaro ro etio ro isioidirotiti-dumo, neio Godi edi kiwaboi maumo ro neito odouti-ri pua.

¹¹ Nio arua keba se ibo gorowomidiro. Kaupoti Godi ro nio marea tato ta-giwai, ina tarena ta-giwai. Ibose nio nou ro mea tuputupu urubia to ta-giapoi. Nedi tanaro peteibi ro Godi ro nio aboto ta-gisioidiro-ibi, Abera Naramu Iesu Keriso nou edi pupuwo ro neito, ibose Tarena Urio edi pupuwo ro neito.

Durupi to Godi masiro auna kowaititi modobo ie

¹² Arua urubia nio abato na-orowomidiro ibo iaro-dumo, 'Ata tanaro ata mo ro kosioidiro aboto, ata sabi tato ie.' Kaupoti nio mo ro ibo mimowapotai-ro, arua tanaro durupi to nimo ro kisioidiro ato, nimo neio ro iwarebai-ri pua. Ina neio ro ibo, 'Ata tanaro ata mo ro kosioidiro aboto, ata sabi tato ie.' Kaupoti nio mo ro ibo mimowapotai-ro, ata ubauba tanaro ata ro mo nou wisa tato woko dubu to ararasoro-ri pua.

¹³ Nio arua ro ibo iaro-dumo, 'Ohona Godi ro nimesioidiro nimo ro kiho aboto, ibose niro turi nou ro nimesioidiro ohona iaremo na.' Kaupoti nio mo ro ibo mimowapotai-ro, ohona ra sopu durupi ra saiki ata Godi ro womu to ama-iedea-mari.

Ina ibo aro mamo, 'Nimo durupi upo tanaro kisioidiro aboto nimesioidiro. Idaibo sosoro ie durupi ohona sogoi ro na-orobai, ohona aise kiho ie.'

Kaupoti nimo durupi simara ubi to ata mutu koroho aboto, Godi ro nou sapuwo to imesioidiro pua. Abera Naramu ubi tanaro kemesioidiro sapuwo to nimesioidiro. Nimo durupi Abera Naramu ro tiaurititi-die.

¹⁴ Godi edi pupuwo korosa ro Abera Naramu pamo rido nouto gowameai-ro. Ina nou edi pupuwo korosa ro nimo nou ro neito anama-iwame-ri.

¹⁵ Nio umoro tato ra ibo nio durupi Keriso sapuwo durupi ie? Nedi era gabo tanaro ro nio ro kisioidiro modobo pua. Nio umoro tato ra ibo, nio kaokao se edi durupi na-iworohuti-dumo, Keriso ia durupi atemo ie? Ina kimibiria dubu ro modobo ra Keriso durupi

era gabo mamio durupi aboto kowateai? Imese modobo ia pua, tarena ia ie!

¹⁶ Nio umoro tato ra ibo, nio ata, durupi beda tau ato owateai era gabo orobo aboto, neitiro durupi teibo kaupoti to imese ararapoi-do? Mabu owerā tiamo Tarena Buka ato ibo, *Dubu orobo mutu karadabuai ato neitiro kaupoti durupi aise koi ie.*

¹⁷ Kaupoti Abera Naramu aboto etu ro ateai, neitiro urio kaupoti aise koi ie.

¹⁸ Ina noudo ie upo tanaro aboudo ba-daragarewado-mo. Arua ubauba tanaro nio ro na-isioidiro-dumo, nio durupi neio ro ubauba egea mere se kimowaititi ie. Kaupoti etio ra upo tanaro na-isioidiro-dumo neio simara durupi marea nakara se iremowaititi-dumo.

¹⁹ Nio umoro tato ra, Tarena Urio Godi ro na-gemeiriai-ro nio aboto, nio durupi nou komidiro moto ie? Kimibiria urubia, nio Godi do ie, nio do pua.

²⁰ Mabu nio nou ro auna wisa to ta-gimidai, Iesu karima na-garawiriti. Ina noudo ie nio ro durupi to beda tanaro isioidiro-dumo, modobo ie sirio tau Godi masiro auna kowaititi.

7

Kitamudiro owerā orobo ra uramu ra sapuwo to ie

¹ Korini urubia, nio edi kemodowa owerā ro na-gisioidiro-rimo mo aboto, erere kemodowa owerā mutu e. Ata ibo ie, 'Urubia dubu modobo ra orobo mutu koroho tato komidiro?'

² Kaupoti urubia sirio iato na-orowomidiro upo tanaro auna se isioidiro-dumo, ina noudo ie erere dubu neio modobo ie simara upi mutu koroho. Ibose erere mamio neio modobo ie simara uramio mutu koroho.

³ Uramu nu orowairiai mamio simara orobo mutu kirobu-ma aboto. Nou mea tanaro ie uramu ro tanaro kemesioidiro aboto, mabu nedi dubu ro nou uramu e. Ibose orobo uramu aboudo orowairiai mamio tanaro kemesioidiro aboto, mabu nedi orobo ro nou orobo ie.

⁴ Orobo, oro edi durupi ro uramu do ie, oro do pua, ibose uramu, oro edi durupi ro orobo do ie, oro do pua.

⁵ Orobo oro durupi uramu aboudo emowairiai mamio, ibose uramu durupi orobo aboudo emowairiai mamio. Kaupoti nitiro atu se ubi koi ato osio ra irimo ra mino to komidiro aboto, mabu nitiro ubi ie Godi aboto auna se kararatoro, tau nitiro ro kohodowa ie. Nedi tanaro ro na-ororoporeai Godi mutu, iato nitiro modobo ie ina karadabuai, tanaro kisioidiro aboto. Nitiro tuturu tau to damodamo se na-omidiro-do karadabuai tato, Satani edi tau ro nato idoutiti-die upi dubu nou ro nato iwaibiriotiti mau kisebo aboto, mabu kororodiobuti tanaro nio abato auna se owamo pua.

⁶ Nio mo ro ibo imowauti pua, orobo uramu mutu atu moro ato irobuti mamio, ina ibose uramu orobo mutu atu moro ato irobuti mamio. E e io mo ro ibo nutura Godi aboto kararatoro ato, io nitiro egea mere se nato korohodowa ie.

⁷ Nou mo ubi ie nio mo sosoro korowomidiro modobo ie orobo tato. Kaupoti nimo kimibiria

urubia erere se Godi ro modobo ta-niwaititi erere tanaro kisioidiro aboto, ata nou ro modobo kowai ie kede a aboto, ina ata nou ro modobo kowai ie nakara se komidiro aboto.

Kararemo tato urubia garamio mutu ower a neio sapuwo to ie

⁸ Kararemo tato urubia, ibose garamio mamio, mo ower a ibo ie nio aboto. Mo nakara se beda sosoro nomidiro, nio idaibo sosoro korowomidiro modobo ie.

⁹ Kaupoti nio ata abato auna ubi na-owamo kede a aboto, nou nato kiamuai ie. Kaupoti nio simara ubi kidiobuti modobo tato, taie nio aise ba-dararemo-mo. Mabu modobo pua nio auna ubi mutu korowomidiro era sosoro kirarebo, tanaro kisioidiro aboto. Modobo ie aise ba-dararemo-mo.

Kimibiria orobo ra uramu ra neitiro korohodowa modobo ra

¹⁰ Kimibiria urubia, nedi ower a ro nio aboto ie, nio mo ro pupuwo ower a anama-imia-ri. Mo ower a pua, ower a ia Abera Naramu aboudo ie. Orobo, oro modobo pua uramu kararubia,

¹¹ ina oro ro uramu kararubia ato modobo ie nakara se komidiro. Oro ubi tato nakara se komidiro aboto, nitiro ro modobo ie mibo koporeai. Ina ibose uramu oro simara orobo ararubia mamo.

Ower a kararemo urubia sapuwo to ie

¹² Mo ina ower a mutu e, nio etio ra kimibiria tato upi mutu na-owomidiro, ibose kimibiria tato uramio mutu, nedi ower a ro nio aboto ie. Mo simara ower a ie, ibo pua Abera Naramu ower a. Kimibiria dubu, oro orobo kimibiria tato

orobo ato, ina nou ubi ie oro mutu komidiro,
nedi orobo ro oro ro ebesiai mamō.

¹³ Ibose kimibiria orobo, oro uramu kimibiria
tato uramu e ina nu ubi ie oro mutu komidiro,
nedi dubu ro oro ro ebesiai mamō.

¹⁴ Mabu towamo nato, kimibiria tato uramu
kimibiria orobo ro meana kowaititi ie. Ibose
kimibiria tato orobo kimibiria uramu ro meana
kowaititi ie. Mo ro nedi owera ro dese to
na-niatiti karasaubuti owera rasiri ie, ina nitiro
merebusere tarena merebusere to ararasoro-ri
pua, marea merebusere to ba-garapoi-rimo.
Kaupoti mo ro edi owera ro niatiti morobise ie,
nitiro merebusere tarena ie.

¹⁵ Ina kimibiria tato na ro nu simara ubi ato
oro na-wararubia, nu simara se ma-morowati.
Idaibo sosoro tanaro kororosioiidiro ato,
kimibiria dubu o orobo, hodo oro aboudo
ororidiro-ri pua. Godi ubi ie nio miro maumo
ato korowomidiro.

¹⁶ Oro etu ra kimibiria orobo to
na-wararasoro, oro umoro pua oro ro kimibiria
tato uramu Godi edi pupuwo ro neito kowameai
ie Godi aboto, nou kimibiria dubu to kararapoi
ie. Ina ibose oro etu ra kimibiria dubu to
na-wararasoro, oro umoro pua oro ro kimibiria
tato orobo Godi edi pupuwo ro neito kowameai
ie Godi aboto, nou kimibiria orobo to kararapoi
ie.

Oro Godi ro karapoi ato iato se dotoi

¹⁷ Nio Iesu patu urubia erere mino to
na-orowomidiro, nio mo ro a-nimowapotai nio
ibose ba-dirowomidiro Abera Naramu ro
na-girapoi-ro, nio idaibo sosoro orowomidiro ri.
Godi ro nio komidiro muro edi tau ato

gimohoduti, imesere mamo, idaibo aise ba-dirowomidiro. Ina Iesu patu urubia erere sabowa ato na-orowomidiro, neio mo ro ta-nimowapotaiddiro nedi tanaro ro obodoro ri.

¹⁸ Iu dubu nou Godi ro beda tau ato gohodowa Iesu owasoro ri, nou dubu simara takamai kebase ta-gasiai-rimo, modobo pua nou Iu owera umoro tato dubu to karatigi. Idaibo karatigi tanaro nou ro kosioidiro ato, nou idaibo sosoro dubu e simara takamai nou ro bobo ato orio takamai kowateai. Urubia dubu durupi takamai kasiai tato, nou Godi ro karapoi ato, nou durupi takamai kasiai modobo pua.

¹⁹ Durupi takamai kasiai o kasiai tato, io auna tanaro pua, neitiro atu sosoro ie. Auna tanaro nou e Godi sabi kibodoro.

²⁰ Oro Godi ro na-gohodowa-ro oro beda sosoro gomidiro, ibose ba-dimidirotiti.

²¹ Oro Godi ro edi tau ato gohodowa-ro, oro wisa tato woko dubu to a-gararasoro ra? Oro wisa tato woko dubu to na-gararasoro, nou sapuwo to modobo pua mibo kimaragoidiro kiworohuti. Kaupoti oro ro mea tau na-owea iedi wisa tato woko ro nou aboudo kosuruwo aboto, ioudo aise dosuruwo-ro.

²² Mabu nio etio ra wisa tato woko kisioidiro urubia Godi ro edi tau ato girapoi-ro, nio ibose Iesu ro nato giapopo-ro mibo tato urubia to ararasoro ri. Ina ibose ie nio etio ra Godi ro beda tau ato gihodowa nio wisa tato woko urubia pua, abora nio Keriso edi wisa tato woko kemesioidiro urubia ie.

²³ Nio Iesu ro auna wisa to giapopo-ro. Ina noudo ie nio modobo pua wisa tato woko

kisioidiro arua urubia abato.

²⁴ Niramio, nio beda sosoro gorowomidiro
Godi ro na-gihoduti, ibose ba-dirowomidiro.

Kereredea ra o kereredea tato ra?

²⁵ Ina abora nio mo ro ata owera
anama-imowapotai-ri, kararemo tato urubia
nedi owera ro neio sapuwo to ie. Mo simara ubi
ato nisioidiro nedi owera ro neio kiwarebai
sapuwo to ie, Abera Naramu Iesu mo nou ro
emowapotai pua. Mo beda sosoro
nimaragoidiro, nio ro nou ibodoro rie. Abera
Naramu auna natonato goi-ro mo aboto. Mo
ubauba to na-nimidiro titi nou ro newesegerai
meana to, ina noudo ie nou wisa tato nirimagare
maumo ato mo nou ro morobise owera
kimowauti dubu to ta-napoi-ro.

²⁶ Abora sirio ubauba tanaro ro
ororosioidiro-dumo kimibiria urubia aboto. Ina
nio mo ro nou ri nimaragoidiro ibo, modobo ie
nio abora kaokao se beda sosoro orowomidiro,
idaibo sosoro ba-dirowomidiro.

²⁷ Oro orobo mutu na-omidiro, iedi orobo ro
oro ro ararubia mamu, nou mutu aise
domidiro-do. Oro orobo tato na-omidiro, ibose
to domidiro, orobo osora mamu.

²⁸ Kaupoti, osio ro besere kedea ato, nou ro
ubauba tanaro osioidiro-ri pua. Ibose irimo
besere uramu ro kedea ato, nou ro ubauba
tanaro osioidiro-ri pua. Kaupoti nio etio ra
na-gararemo-rimo, nio korowomidiro maumo
ato koko tau amadimi-iauri-ri. Mo ubi ie nio
ubauba tanaro kisioidiro moro rido kiwasiuti,
mo ro nou ri nimowapotai.

²⁹ Niramio, nedi oweru ro mo ro nou nemabuti nio abora noti nama-imowapotai-ri. Tau komukere ro orobai-die. Abera Naramu aupise ie korowameai. Ina noudo ie, nedi tau ro neido uramio nio upi kiaremo tato dubu sosoro ba-dirowomidiro. Modobo pua nio auna se kimaragoidiro simara upi kamade kiwaititi sapuwo to.

³⁰ Nio kimaragoidiro auna se iamo mamu beda kamade tato tanaro ro ororosioidiro-dumu, ibose kamade tanaro na-ororosioidiro-dumu nio abato, ina namabu kimade tanaro sapuwo to.

³¹ Nio korowomidiro maumu ato nedi tanaro sirio ro na-ororosioidiro-dumu, Godi woko odiobuti mamu. Kimibiria urubia nio etio ro isioidiro-dumu erere tanaro, nio modobo pua ioudo auna se kirarebidiro. Mabu abora tau aupiaupi ro orobowado-die nedi sopo duriomoro ro nou simara tanaro mutu kororoporeai aboto.

³² Kaupoti mo edi ubi ato na-nisioidiro nedi oweru ro, mabu mo ubi tato ie nio kimaragoidiro auna se kiworohuti sopo duriomoro tanaro sapuwo to. Mo ro umoro oweru nio aboto nou ri nisioidiro, mabu nio kararemo tato na-orowomidiro, auna se imaragoidiro-dumu Abera Naramu ubi tanaro kisioidiro aboto, ibose gabo beda sosoro iamo-die nou kamade kowaititi aboto.

³³ Kaupoti upi ra mutu urubia neio kimaragoidiro siriosirio mutu irowomidiroiti, neio auna se imaragoidiroiti-dumu upi kamade beda mino to amadimi-iwaititi-ri.

³⁴ Iedi upi ra mutu urubia ro neio idaibo sosoro ie pe teibo erere moro to

iabidiro-madumo.

Ina atu sosoro tanaro ibose to ororosioidiro-dumo uramio tato mamio aboto, ibose irimo busere aboto. Neio auna se imaragoidiro-dumo Abera Naramu ubi tanaro kisioidiro aboto, ibose gabo beda sosoro iamo-die nou kamade kowaititi sapuwo to. Neio ubi ie tarena mino to korowomidiro, modobo pua koroho arua dubu mutu.

Kaupoti uramio ra mutu mamio, neio siriosirio kimaragoidiro mutu irowomidirotiti, neio auna ubi ie uramio ubi ato se koroho uramio kamade kiwaititi sapuwo to.

³⁵ Mo ro nedi owera ro nou ri nisioidiro nio meana sapuwo to ie, ibo pua nio mo ro kidiobuti. Mo ubi ie nio mea se korowomidiro Abera Naramu se kowaititi kamade. Idaibo mino to korowomidiro ato, nio kimaragoidiro erere se iworohuti-ri pua.

³⁶ Kaupoti ata osio gabo na-emoworohuti-dumo ata besere nou ro edea ri, edi besere ro uramu ro kedea tau kebase ta-gorobai, ina iedi osio ro auna ubi ro owamotiti nou mutu koroho. Nedi osio ro nou ro ubauba tanaro osioidiro-ri pua iedi besere ro kedea ato, nou ro simara ubi ato ba-medea.

³⁷ Kaupoti nedi osio ro kimaragoidiro na-iwia ibo nou orobo edea-ri pua, mabu nou kororodiobuti mutu e, ina nou koko ta-go'i edi besere ro nou ro edea-ri pua. Nou ro idaibo mea tanaro kosioidiro ie.

³⁸ Ina noudo ie imese owera sirio kidabu'ai ato, gabo kemoworohuti besere uramu ro na-edea, io mea tanaro kosioidiro ie. Kaupoti ata osio ro

gabo kemoworohuti besere kedea tato, nou ro imese mea ia tanaro kosioidiro ie.

³⁹ Uramu aise na-omidiro, orobo uramu abato se kateidiro ie. Kaupoti uramu na-waraburai iedi garamu orobo ro nou abato owamo kiamuai ata dubu aboto. Nu modobo ie kimibiria dubu aboto se kiamuai.

⁴⁰ Ina nou mo simara kimaragoidiro owera ie, garamu orobo nakara se komidiro ato, nou abato kamade ohu ato kowamo ie. Ina mo ibose to nimaragoidiro Godi edi Tarena Urio ro mo abato ibose to omidiro.

8

Ohona kiaiwo orora aboto

¹ Ina abora nio mo ro nedi owera ro nou anama-imowapotai-ri, ohona kiaiwo orora sapuwo to. Nimo umoro ie ibo, nimo imese sirio se umoro mutu e nou sapuwo to. Umoro urubia abato na-iamo, nedi umoro ro neio iaupawado-dumo. Kaupoti kimibiria urubia nirimagare na-eremati-dumo, borubi kimibiria urubia pupuwo idaibo mino to iremowaititi-dumo.

² Beda dubu ro imaragoidiro ibo nu auna umoro ie imese tanaro, nu umoro mea se oi pua.

³ Godi nirimagare etio ro emati-dumo, Godi umoro ie neio.

⁴ Ina mo keba owera to a-norowameai-die, nedi owera ro nou anama-imowapotai-ri ohona kiaiwo orora aboto. Nimo atu se umoro ie nedi duriomoro ro nato ota titi neio ata masiro tato ie, neio keremiro tato ie, nedi sopu duriomoro

ro nato. Ina ata omidiro pua morobise ia pupuwo Godi sosoro, nu kaupoti nou se ie.

⁵ Mabu urubia sirio ro orora na-irorutiti-dumo, neio ro Godi to iasoro-dumo, ibose arua orora Abera Naramu to iasoro-dumo, Adiri sabowa ato ina nedi sopu duriomoro ro nato.

⁶ Kaupoti nimo sapuwo to morobise ia Godi kaupoti nou se ie, nou nimo Abera ie, nou ro imidirotiti ina nimo ti-norowomidiro nou ubi tanaro emesioidiro ri, ina Abera Naramu kaupoti nou se ie nou Iesu Keriso ie. Imese nakomu sirio Godi ro Iesu edi tu ro neito gisioidiro. Nimo kimibiria urubia, urio keremiro Iesu aboudo ta-nimade-rimo.

⁷ Kaupoti arua kimibiria urubia abato, idaibo umoro ota titi sapuwo to iamo pua. Arua kimibiria urubia kebase ota titi sapuwo to ohona ta-iaremotiti-mo. Neio ro nedi kimaragoidiro ro nou iworohutiti-mo ibo ota titi keremiro ie, neio pupuwo mutu e. Neio idaibo sosoro kimaragoidiro mutu gerewesegerai-rimo Iesu aboto, ina neio ro momuo se imeserai pua, sapuwo tirobidiro-dumo. Ina arua urubia ro idaibo ohona ota titi sapuwo to na-gimaremo-rimo, arua kimibiria urubia ro na-ihotiti-mo, neio ro ibose kimaragoidiro to ta-iaurititi-mo ibo, 'Nedi ohona ro orora do ie.' Ina neio ibo gimaragoidiro-rimo, 'Nedi tanaro ro nimo ro na-nisioidiro-dumo, nou mea tanaro ra o ubauba tanaro ra?' Ina neio saro to nato gimaragoidiro-rimo ibo, 'Etu umoro ra, nimo ro ubauba tanaro nisioidiro-dumo.'

⁸ Ohona kiraia ato, nimo nou ro ubauba iwai-ri pua Godi sosoro gabo ato. Ibose ohona

kiraia tato, nimo nou ro meana iwai-ri pua Godi sosoro gabo ato. Kaupoti erere ohona ro nimo neio ro Godi aboto iwosiomai-ri pua.

⁹ Nio ro modobo ie simara ubi ohona kiho, ata sabi tato ie. Kaupoti mea se diraroweauti-mo. Modobo pua pupuwo tato kimibiria urubia nio ro ubauba kiwai, nio edi kiho tanaro ro nouto.

¹⁰ Mabu nio etio ra auna umoro mutu urubia to na-wararasoro-dumo, pupuwo tato kimibiria urubia ro, nio neio ro namadimi-iauri-ri ota titi ohona daimo ato na-iho-dumo, nio neio ro amadimi-imatiouti-ri, nato amadimi-iho-ri. Nio abato umoro tiamo ibo, ota titi ohona na-iho-dumo nio ro ubauba tanaro isioidiro pua. Kaupoti idaibo umoro neio abato iamo pua. Neio niro turi rido na-imowapotai-die ibo, 'Io ubauba ie iedi ohona ro nou kiho aboto', ina neio ro nato na-iho-dumo, neio kimibiria ubauba aise kiwai ie.

Ina noudo ie nio edi auna umoro ro neido, nedi ubauba ro Godi edi gabo ro noudo emesere-dumo.

¹¹ Nedi pupuwo tato kimibiria urubia ro Godi ro kohodowa dubu Iesu, neio sapuwo to garaburai. Nio edi auna umoro ro neito ubauba tanaro na-isioidiro-dumo pupuwo tato kimibiria urubia aboto, nio ro idaibo neio kimibiria temeteme kimio ie.

¹² Nio ro idaibo ubauba tanaro na-isioidiro-dumo nedi urubia ro neio aboto, nio ro ibo pua neio aboto se kisioidiro, nio ro ibose Keriso aboto kisioidiro ie.

¹³ Ina noudo ie mo ro orora kimamo ohona kiho ato, mo kimibiria neama ro nato na-nowea-die, ina nu siri nato na-woi-die, ina

nou ubauba tanaro nato na-wosioihiro, modobo ia pua. Modobo ia pua idaibo tanaro ro kororosioihiro! Tanaro idaibo sosoro kowamo ato, ata dao kere ata mo ro beda kouho pua, ina mo kimibiria neama mo ro ubauba to owodoro-ri pua.

9

Morobise ie Pauro nou Iesu ro kotiodorai dubu e

¹ Nedi woko ro mo ro kosoiohiro aboto mo ata nakomu ata ro a-nodiobo ra? Mo Iesu ro kotiodorai dubu pua ra? Nimo Abera Naramu Iesu mo ro simara ia idomari to owea pua ra? Nimo Abera Naramu ro mo ta-nadabuai, mo ro nou woko sirio tau aise na-nemesioihiro-titi, nio ia ubauba aboudo a-gerewesegerai-dumo ra Iesu kowasoro aboto? Morobise ra?

² Mo arua urubia ro a-natidiouti-dumo sekere, kaupoti nio ia umoro ie ibo mo Iesu ro kotiodorai dubu ata nou se ie. Nio kimowauti aboto mo pupuwo korosa Abera Godi aboudo gou-ro, ina nou mabu rido ie nio Iesu kowasoro urubia to ta-gararapoi-rimo.

³ Ina mo etio ro nasorotiti-dumo, nou mo korowairiai owera ie.

⁴ Neitiro woko sapuwo to nio ro ohona to kiwarebai-ma ubauba ra? A?

⁵ Ina neibi aboudo sabi ra, simara kimibiria mamio neio mutu kou, Abera woko neio mutu atu se kemesioihiro? Mabu Pita arua kitiodorai urubia mutu, ibose Iesu niramio neio upi mutu idaibo sosoro atu se iroho-dumo.

⁶ Nio ibo a-imaragoidiro-dumo ra mo Banabasi mutu mani woko neitiro ro se isioihiro-ri, ohona

ra obotama ra imade na, ina arua kitiodorai
urubia ro ibo isioidiro pua ra, a?

⁷ Beda ami dubu ata ro gou boso aboto simara
mani to? Beda dubu ata ro gomidiro pari ohona
kibouti ato, ina kiho tato? Ibose beda urubia ra
sipisipi nanigosi na-iworohuti-dumo, neio
simara sapuwo to nono isi kiratuti ie.

⁸ Nedi owera ro mo ro na-naro, urubia
kimaragoidiro owera a-naro ra?

⁹ Mabu idaibo sosoro owera Mose ia ro sabi
buka ato ta-gisoidiro ibo *Burumukau urubia
dubu woko kemesioidiro ato, idaibo woiti iopu
na-ituti nu matagoro emosuputi mamo, nou ro
arua iopu modobo ato kiho ie.*

Morobise ie nimo umoro ta-noi-rimo ibo Godi
edi sabi ro na-gosioidiro, burumukau sapuwo to
se a-gosioidiro ra? E e.

¹⁰ Godi ro nedi atu sabi ro nou woko
kemesioidiro urubia neibi sapuwo to ibose to
gosioidiro. Ina noudo ie pari ato goto etio ro
kioditi ra, ina pari ohona etio ro kidabuti ra,
neio ro simara woko na-isioidiro-dumo pari ato,
neio kimaragoidiro to kiauri ie ibo pari ohona
sapuwo to, ido anamadimi-iho-ri.

¹¹ Urio ota iopu nio abato neibi ro
na-nibouti-birimo, ina nio aboudo modobo pua
ra neibi wisa namabu to kiwarebai-bi?

¹² Arua urubia Godi woko
na-emesioidiro-dumo, neio modobo ie nio ro
kiwarebai, ina neibi nio ro auna se kiwarebai-bi
modobo ia ie.

*Pauro imaragoidiro pua wisa imade-ri urubia
aboudo*

Kaupoti sirio mibo tanaro neibi abato na-irorosioirotiti-mo, nedi kiwarebai tanaro ro nio neibi ro imowapotai pua isioihiro ri neibi aboto. Mabu neibi ubi tato ie ata tanaro ata neibi ro na-nosioihiro-bimo, Abera Naramu edi mea owera ro nou ro kodiobuti.

¹³ Nio umoro tato ra ibo Godi edi Tarena Moto ro nato edi urubia ro iwatititi-dumo woko, neio woko kisioidiro maumo ato ohona sapuwo kimade ie? Ina ibose Tarena Moto ato beda urubia ro imatowotiti-dumo patapata ato kiwoubua namabu dao, nedi urubia ro sapuwo dao kimade ie.

¹⁴ Ina idaibo sosoro ie Abera Naramu ro nimo kebase ta-nimowapotai-ro idaibo tanaro nimo ro aise isioihiro ri. Ibo mea owera Iesu sapuwo to etio ro imowautiti-dumo, nedi urubia ro modobo ie kirowidiro urubia ro kimio wisa.

¹⁵ Modobo ie mo ro mea owera kimowauti woko sapuwo to, kirowidiro urubia aboudo mea wisa kimade. Kaupoti mo wisa komio sapuwo to, ata owera aro pua. Mo nio ro kowarebidiro sapuwo to isioihiro pua nedi titi ro. Nio mo ro imowapotai pua mo owarebai ri, nou sapuwo to a-neremowabu. Modobo pua nedi keremowabu mabu ro mo aboudo karaseperai. Modobo ie mo kebase karaburai!

¹⁶ Mo auna se eremowabu ri pua mea owera Iesu sapuwo to kimowauti aboto, mabu mo nou ro notiodorai-ro mea owera nou sapuwo to imowauti ri, ina urubia mo ro aise kimowauti modobo ie, io mo woko ie. Ina mo ro imowauti tato mea owera nou sapuwo to, mo ubauba ro ba-mowea-ro.

¹⁷ Mo simara ubi ato kou rasiri ie mea owera

Iesu sapuwo to imowauti ri, mo ro wisa urubia aboudo ba-nimadetiti. Kaupoti nou mo woko ie, aise mosioidiro-ro, mabu Godi ubi ie mo ro nedi woko ro kosioidiro aboto.

¹⁸ Ina noudo ie mo ro beda wisa nimade nedi woko ro nou sapuwo to? Mo wisa ibo ie, mea oweru Iesu sapuwo to urubia mo ro na-nimowautiti wisa tato se. Io mo morobise wisa ibo ie. Mo ro urubia wisa tato na-nimowautiti, mo ro neio kiwaro modobo ie wisa komio sapuwo to, kaupoti mo ro idaibo sosoro iwaro-ri pua.

Pauro urubia sirio sowake dubu e

¹⁹ Mo ata dubu ata ro emotohiti pua, nou wisa tato woko kemesioidiro aboto. Mo ro mea oweru urubia na-nimowautiti urubia kirowidiro sapuwo to, mo ro sirio tau wisa tato woko nisioidiroiti neio sapuwo to, nedi oweru ro mea se kimade aboto.

²⁰ Mo Iu urubia mutu na-nimidirotiti, mo neio mino to nimidirotiti neio kiwairio aboto. Mabu mo ubi ie sabi maumo ato edi urubia ro irowomidirotiti, neio kiwairioidiro Iesu aboto. Kaupoti abora mo Iu urubia edi sabi sirio ro neio maumo ato omidiro pua.

²¹ Etio ra Iu urubia sabi maumo ato korowomidiro tato, mo ibose neio aboto ta-niradabutiti, neio Iesu aboto iwairio ri. Ibo pua Godi edi sabi ro mo ro kibodoro tato. Keriso edi sabi ro nou maumo ato na-nomidiro, noudo osuruwo-ri pua. Ina noudo ie, mo ubi ie sabi maumo ato korowomidiro tato urubia neio iwairioidiro rie Keriso aboto.

²² Pupuwo tato kimibiria urubia aboto mo ta-nidabutiti, neio kimibiria pupuwo

kimowaititi sapuwo to. Mo ro erere tanaro sirio, erere urubia sosoro gabo ato, mo neio sosoro komidiro umoro ti-noititi. Mabu mo ubi ie neio amia erere tanaro sirio to mo ro dodio tato se imade rie, ina neio Godi ro ubauba aboudo kiapopo sapuwo to ie.

²³ Nedi tanaro sirio ro nou sapuwo to na-niatiti, mo ro durupi to imese nisioidiro. Mabu mo ubi ie mea owera Iesu sapuwo to korobodorouti imese sirio urubia aboto. Ina ata mabu nou e, mo ro Godi edi meana ro atu se anamadimo-owea-ri, arua kimibiria urubia mutu.

Kororodiobuti auna se modobo ie

²⁴ Nio umoro tato ra ata owera na-owamo ibo, hio korowararioidiro urubia sapuwo to? Neio atu se korowarario ie, ina kaupoti mere ro komidai ie wisa. Nio idaibo mino to ba-dorowarario-mo, nio erere se wisa kimade sapuwo to, huru to imetere mamo.

²⁵ Korowarario urubia karatamudiro maumo ato simara durupi mea mino to kimododidiro ie. Mabu neio ubi ie mea wisa kimade, ina nedi wisa ro tuturu tau to iamo-ri pua, womu to samo ito amadime-ererede-ri. Kaupoti iedi wisa ro nimo ro Iesu Keriso na-nowasoro-dumo nou sapuwo to namadimi-imade-ri, womu to ererede-ri pua, womu tato womu tato aise ama-iamotiti-ri.

²⁶ Ina noudo ie urubia dubu kirario kawa na-irario koropodai moro kiauri tato, mo idaibo mino to irario-ri pua.

Ina ata pikisa owera ibo ie. Ata dubu karaberemo aboto na-wou, nou tu idaibo

na-iwaguwoidiro nasa dubu durupi ato araremo tato, mo idaibo sosoro dubu pua.

²⁷ Mo durupi auna se nowairiawadotiti ubauba tanaro kisioidiro aboudo. Mo sumi tama ra dao ra koko niwaititi, mo edi durupi ro mo wisa tato woko dubu to kararapoi aboto. Ina noudo ie mo ro urubia mea oweru Iesu Keriso sapuwo to kimowauti saro gabo ato, modobo pua Godi ro idaibo oweru karo mo aboto ibo, 'Mo woko oro ro mea se emesiodiro pua, ina nou mabu ato ie oro mea wisa omia-ri pua.'

10

Isiraere urubia aboudo umoro tanaro daratamudiro-mo

¹ Ina noudo ie mo ubi tato ie nio ro woki kimatiti beda tanaro ro gororosioidiro-rimo nimo nasa, naminami neio aboto, neio atu se goto se duriomoro ato edi tau ato na-irohotiti-mo. Neio imese atu se toboru kere maumo ato outiti-mo nou ro iwaboititi. Nedi urubia ro toketoke oromo turi na-giabu-rimo womu tato ata sapuwo to mea se ti-gorowateai-rimo,

² io idaibo sosoro ie neio Mose ro obo to giwarumia. Io neio Mose ro obo to na-giwarumia nou kowasoro urubia to ararasoro rie.

³ Nedi urubia ro edi mino to na-irohotiti-mo neio imese Godi ro ohona ata sosoro imiotiti-ro, ina iedi ohona ro neio ro atu se ihotiti-mo.

⁴ Ibose neio obo Godi ro ata sosoro imiotiti-ro nadi rido. Neio obo edi nadi rido na-idiotiti-mo edi nadi ro neio nou mutu atu se outiti-mo. Iedi

nadi ro Godi ro kohodowa dubu nou sosoro
owapotaiddiro-die nimo aboto.

⁵ Io morobise ie neio meana Godi aboudo
ta-iaurititi-mo sekere, kaupoti neio sirio se nou
kamade tato owaititi-mo, neio ro nou sosoro
gabo ato ubauba tanaro na-isioidirotiti-mo. Ina
noudo ie nedi urubia ro ipi gabo ato Godi ro aise
giopiauti, neio pamo durupi goto se duriomoro
ato kimesere kawa imeseretiti-mo.

⁶ Nedi tanaro ro na-gororosioiddiro-rimo, nimo
umoro koi sapuwo to gororosioiddiro-rimo. Neio
giropu auna ubi ro iamotiti iedi ubauba tanaro
ro kisioidiro aboto, ina noudo ie nimo ro idaibo
ubi imatiouti-ri pua.

⁷ Neio arua ro orora ta-irorutiti-mo, nio ro
idaibo sosoro ubauba tanaro isioidiro mamo.
Nimo edi nasa naminami ro arua idaibo tanaro
nou gisioidiro-rimo, ina neio Godi urubia sekere,
kaupoti Tarena Buka ato oweru ta-giamo ibo,
*Neio ro burumukau dawade gorodi to
na-gosioidiro-rimo, taie iato gemowabu-rimo.
Neio aise giriribua-rimo, muguru sosoro komaro
iato gorowamaro iedi burumukau ro nou sapuwo
to. Ibose neio ro soriomu nou sapuwo to iato
gosioidiro-rimo, koko obo iato gidio-rimo. Neio
kamade ri aise giaiauti-rimo wasare iato
gemaboduti-rimo.*

⁸ Ina ata oweru ibo ie, nimo ro modobo pua
erere upo tanaro kisioidiro. Arua Isiraere
urubia idaibo tanaro nou gisioidiro-rimo, ina
noudo ie Godi ro ubauba temeteme nato
gemeiriai-ro neio aboto, ina kaupoti saiki ato
23,000 urubia neio ro gorowaburai-rimo.

⁹ Ina ata owera nou e, nimo ro modobo pua Abera Naramu kowaibirio nou edi turi mesebea ro kemasaudai. Ina arua Isiraere urubia idaibo sosoro tanaro nou gisioidiro-rimo, Abera Naramu neio ro a-gowaibirio-rimo, taie Godi ro bagawe sirio neio aboto nato gimeiriai-ro, bagawe ro pamo se nou ri iagegetiti-mo.

¹⁰ Ibose masawe owera aro mamu Godi woko urubia aboto. Arua Isiraere urubia idaibo mino to gorowosuruwo-rimo masawe owera ibo iarotiti-mo Godi woko urubia aboto. Ina Godi edi boso sowake urio ro nou ri gemeiriai-ro neio aboto, neio aise giopiauti.

¹¹ Nedi ubauba tanaro sirio ro na-gororosioidiro-rimo neio aboto, nimo ro neio aboudo eremoputi rie ibo, morobise ie ubauba mimeserai-rimo. Nedi owera ro nou mabu ato giatiti-rimo, nimo itamudiro rie idaibo tanaro isioidiro mamu. Nimo nedi tau ato na-norowomidiro womu tau aupiaupi ro orobowado-die.

¹² Mabu nio na-imaragoidiro-dumo ibo, 'Koko se ti-norowotoi, ubauba nimo aboto odoro-ri pua.' Kaupoti mea se! Nio kiretei modobo pua!

¹³ Beda mutu kiwaibirio tanaro sirio ra nio ro na-giauri-rimo ubauba kisioidiro aboto imudo ri, neio ata sosoro pua, imese sirio urubia atu sosoro kiwaibirio tanaro ta-giauri-rimo. Godi ro beda owera karo ra nou ro aise kisioidiro ie. Nio koko ia kiwaibirio aboudo, nou ro gabo aise imagerewado-ri pua. Kaupoti nio kiwaibirio tanaro ro kiwia ato, Godi umoro ie, nio kiwosuwoduti aboto gabo nou ro kimesioidiro ie, ina iedi koko kiwaibirio tanaro ro nio neio ro iwororuwoidiro-ri pua.

Abera Naramu soriomu ina ubauba urio soriomu

¹⁴ Ina noudo ie nirimagare babio, nio orora kiroru tanaro aboudo ba-daragarewado-mo.

¹⁵ Nio mea muro urubia ie, mo ro beda owera nisioidiro mea se nou ba-dimaragoidiro-mo.

¹⁶ Nimo ro Iesu sapuwo to ohona kiho ato, eso owera na-niarotiti-dumo nou sapuwo to, iedi panikere ro Iesu karima panikere ie. Ina noudo ie atu se na-nidiotiti-dumo, nimo nou mutu kaupoti to imese kararapoi ie. Ina ibose beredi nimo ro kekekiouti ato nou eremasoro na ie, edi beredi ro Iesu durupi ie. Ina noudo ie nou atu se na-nouho-dumo nimo nou mutu kaupoti to imese kararapoi ie.

¹⁷ Nedi beredi ro kaupoti ie, ina nimo kimibiria urubia imese sirio ia ie. Ina noudo ie nimo kaupoti urubia ie Iesu Keriso ro ta-nidabuai, mabu beredi kaupoti nouhotiti-dumo.

¹⁸ Isiraere urubia nio ro ma-dimaragoidiro-mo neio ro edi tanaro ro na-isioidirotiti-mo. Godi aboto dao na-imatowotiti-mo ina etio ro ihotiti-mo, Godi neio mutu idaibo mino to ta-idabutiti.

¹⁹ Mo owera maumo beda sosoro ra, nio ro mea se a-womidai-mo ra? Mo ibo a-naro ra ohona na-imamotiti-dumo ota titi aboto nou auna nakomu e? Ina ibose mo ibo a-naro ra ota titi sapuwo to na-imamotiti-dumo, neio morobise keremiro mutu e?

²⁰ E e! Marasio, mo ibo aro pua! Io nedi urubia ro Godi umoro tato urubia ie, ohona na-imamotiti-dumo neio ro ubauba urio aboto imatowotiti-dumo, Godi aboto imatowotiti pua. Mo ubi tato ie nio ubauba urio aboto karadabu.

²¹ Nio ro Abera Naramu eremasoro na panikere rido kidio, ina ubauba urio panikere rido iato kidio, nio ro panikere teibo ibo imosuwotiti-madumo modobo ia pua! Imese sabi ia ie! Ina ibose nio ro ata saiki Abera Naramu ohona kiho nou eremasoro na, ina ata saiki ubauba urio ohona kiho neio kamade iwaititi ri, io modobo ia pua. Imese sabi ia ie!

²² Nio ro idaibo tanaro teibo na-isioidiro-titi-madumo arua urio kamade kiwaititi aboto, nio ro Abera Naramu kamade a-owaititi-dumo ra? O ibo a-imaragoidiro-dumo ra nio imese pupuwo ia ie, ina Godi nio pupuwo mutu modobo pua? A?

Kimibiria urubia ro beda tanaro kisioidiro ra

²³ Nio arua ro ibo iarotiti-dumo, 'Imese tanaro kisioidiro nimo aboudo modobo ie, ata sabi tato ie.' Kaupoti imese tanaro nimo ro kisioidiro aboto, arua tanaro ro nimo iwarebai-ri pua. Nio arua ro ibo iarotiti-dumo, 'Imese tanaro kisioidiro nimo aboudo modobo ie, ata sabi tato ie.' Kaupoti nimo ro arua tanaro kisioidiro ato, borubi kimibiria urubia pupuwo imowaititi-ri pua.

²⁴ Nakara se eremaragoidiro mamu, arua urubia sapuwo to aise gi-imaragoidiro-ri.

²⁵ Maketo rido kimade ato karima ohona, nio ro kiho modobo ie, ata sabi tato ie. Nio ro auna se imaragoidiro mamu ibo nimo ro ubauba tanaro nisioidiro-dumo nedi ohona ro na-niho-dumo. E e!

²⁶ Mabu nedi duriomoro ro nato ibose beda mutu namabu sirio ro iamo, imese Abera Naramu do ie, nou ro gisioidiro.

²⁷ Ata kimibiria tato dubu ata ro oro aboto na-utura ibo, 'Oro dou-ro, ohona mo moto ato anamadi-iho-ri.' Oro ubi kou nou moto to, orodiobuti mamo aise dou nou moto to. Nou ro oro beda ohona emaremuti, nu oro ro emodoruti mamo ohona sapuwo to, kamade mutu aise gi-iho-ri.

²⁸ Kaupoti oro ata dubu ro na-emowapotai ibo, 'Nedi ohona ro tarena ie kiho aboto, orora aboto kebase ta-iaiwai-mo.'

Nou ro idaibo owera karo ato, oro ro iedi ohona ro iho ate! Mabu oro edi dubu ro emowapotai-die, nu simara kimaragoidiro ie ibo nedi ohona ro ubauba ie kiho aboto. Mo ro ibo utura pua, iedi ohona ro kiho modobo pua,

²⁹ iedi dubu ro nou ro imaragoidiro idaibo. Io mea tanaro ie iedi ohona ro oro ro kiho tato, ina iedi dubu ro nou kimaragoidiro oro ro ubauba emowai-ri pua. Kaupoti ata dubu ata ro idaibo owera karo tato nedi ohona ro nou sapuwo to, oro ro modobo ie nou kiho.

Mabu boira mo ata dubu ata ro nou simara kimaragoidiro to sirio tau kotuputawado ohona kiho sapuwo to?

³⁰ Mo ro ohona Godi aboto eso owera karo ato, ina nato na-niho, mabu boira mo ata dubu ro nedi ohona ro nou sapuwo to kemosurupo? Iedi ohona ro eso owera karo saro gabo ato, Godi ro meana aise kiwai ie.

³¹ Ina noudo ie nio ro beda ohona iho-dumo ina beda obo idio-dumo Godi masiro auna kowaititi sapuwo to gidimi-isioidiro-ri.

³² Nio ro modobo pua tanaro kisioidiro ina arua urubia nio ro ubauba neito kiwaititi, idaibo Iu urubia, Iu owera karo tato urubia, ibose Iesu

kowasoro urubia. Neio ro edi meamea tanaro ro namadimi-iauri-ri neio nio ro ubauba iwai-ri pua.

³³ Mo ro urubia beda sosoro niworohutiti nio ro ibo ba-diworohutiti-mo. Mabu mo nakara se orowarebai-ri pua, urubia sirio iwarebai rie, neio ro womu tato keremiro kowea aboto.

11

¹ Ina nio ro mo kematiouti modobo ie, mo ro Keriso beda sosoro nematioutiti.

Umoro owera ie karadabu ato Godi kemowabu aboto

² Mo kamade owera ie nio aboto, nio ro beda sosoro imaragoidiro-dumo mo ro edi tanaro to nitamudiroiti. Nio ro abora tirobidiro-dumo mea mino to iedi kitamudiro ro Keriso ro mo aboto na-giaiwai-ro, ina nio aboto nou niawai, nio ro ata mino to iwesegerai pua.

³ Ina abora mo ubi ie nio umoro kiwai ibo, Keriso nu keremiro mabu dubu e, imese urubia nou ro gisoidiro. Ina imese dubu sirio Keriso aboudo gou-rimo, orobo nou dubu aboudo gou-ro. Ina Keriso nou Abera Godi aboudo gou-ro.

⁴ Karadabu maumo ato urubia dubu Godi aboto na-wararatoro, o Godi ipusu owera nou ro urubia na-imowauti, eputa korowasiai ato Keriso nou ro siripo kowai ie.

⁵ Ibose karadabu maumo ato, urubia orobo Godi aboto na-wararatoro, o Godi ipusu owera urubia nou ro na-imowauti eputa korowasiai tato, nu uramu siripo kowai ie. Ibose nu idaibo sosoro ie nu sobo ata ro na-owarure.

⁶ Beda orobo ra nu sobo korowasiai tato, nu sobo modobo ie komukomu se kowasio dubu sosoro ba-miworohuti. Kaupoti idaibo tanaro orobo sobo kasio mutu koroho ato, o sobo kowarure koroho ato, auna siripo tanaro ie, nu modobo ie sobo obotama to korowasiai.

⁷ Urubia dubu sobo obotama to orowasiai mamou kararatoro tau ato, ibose Godi ipusu owera kimowauti tau ato. Mabu urubia dubu nu Godi ia sosoro gosioidiro, nu nakara se a-gerematiouti urubia dubu na-gosioidiro. Urubia dubu na-omidiro, Godi edi auna masiro ro nou ro paease kowawuti ie. Urubia orobo na-omidiro, urubia dubu edi auna masiro ro nou ro paease kowawuti ie.

⁸ Mabu keba urubia dubu Godi ro orobo rido osioidiro pua, keba orobo Godi ro dubu rido gosioidiro.

⁹ Urubia dubu Godi ro osioidiro pua urubia orobo owarebai na, urubia orobo gosioidiro urubia dubu owarebai na.

¹⁰ Ina noudo ie kimibiria orobo ro Godi aboto kararatoro ato, ibose Godi ipusu owera kimowauti ato, nou sobo obotama to korowasiai modobo ie. Ina nou abato edi pupuwo korosa ro kowamo ie Iesu urubia Godi ipusu owera kimowauti ato, ibose Godi kararatoro ato. Ina ata mabu nou e, Godi sowake urio sirio torowotoi-die, nio iauri-dioumo.

¹¹ Ina ata sapuwo rido kiauri ato, nio Iesu ro na-gidabuai noudo to ararasoro ri, orobo nakara se omidiro-ri pua, ina ibose urubia dubu nakara se omidiro-ri pua. Orobo ra dubu ra neitiro modobo ie atu se korowarebai.

¹² Mabu urubia orobo keba dubu aboudo gosioidiro, ibose abora imese dubu mamio ro irotuti-dumo. Kaupoti nou se demaragoidiro-mo, imese namabu, imese urubia sirio, Godi nakara se nou se ie nou ro gisioidiro.

¹³ Nio ro nakara se ma-demeiouti-mo, urubia orobo eputa korowasiai tato Godi aboto nato na-wararatoro, mea tanaro ra?

¹⁴ Nio ro nakara se umoro ta-goi-rimo ibo dubu modobo pua tututu sobo mutu koroho, io siripo ie.

¹⁵ Ina nio nakara se umoro ta-goi-rimo ibo mamio ro kiworohuti sobo tututu modobo ie, neio kibodiai ie idaibo sošoro koroho. Mabu sobo tututu Godi ro mamio gimesioidiro, neio eputa iwasioidiro na ie.

¹⁶ Ata dubu ata nedi owera ro nou sapuwo to, owera keremasio ubi na-owamo, nou umoro koi modobo ie ibo, neibi abato, ibose Iesu urubia beda moro ato iradabutiti-dumo, nimo abato mamio ro idaibo tanaro nou ibodorotiti-dumo.

Abera Naramu soriomu nio ro isioidiro pua

¹⁷ Mo ro abora ata owera nama-aro-ri nio aboto, mo ata kamade tato ie, nio mo ro imowabu-ri pua. Mabu nio atu moro to karadabuai ato Godi emowabu ri, nio nakara se ubauba irowaititi-dumo, ibo pua nedi karadabu ro nio nou ro meana kiwaititi.

¹⁸ Mo keba owera nou e nio Godi kemowabu aboto karadabu sekere, kaupoti owera mo ro ta-nirorowai arua urubia aboudo ibo, nio atu moro to na-iradabutiti-dumo Godi emowabu ri, nio erere patu to aise karapeputi ie. Nedi owera ro mo ro egea mere se ta-nimibiria.

¹⁹ Karapeputi tanaro erere patu to nio abato modobo ie kiamo, nio umoro nato amadimo-oi-ri ibo beda urubia ra morobise urubia.

²⁰ Nio na-iradabutiti-dumo Abera Naramu soriomu ohona iho ri, nio ro nou ohona iho-ri pua.

²¹ Mabu nio arua kiho kebase katamuai ato, kimibiria borubi nio ro imasebidiro-ri pua. Ina noudo ie urubia neio ohona mutu modobo ato korowomidiro ie, kaupoti sogoi ro edi kimibiria urubia ro iwati, neio ro imio-ri pua. Ibose nio arua, waini obo auna kidio ie.

²² Nio moto tato urubia ra? A? Ina karadabu moto ato ohona auna se nou mabu ato a-ihotiti-dumo ra, a? Nio ubi ra Godi urubia sopu to kiwororuwoidiro, a? Ibose nio ubi ra namabu tato urubia siripo kiwaititi? Mo ro nio aboto beda owera nama-aro-ri? Nedi tanaro ro nio ro na-isioidiro-dumo, nou sapuwo to mo ro imowabu-ri ra? Marasio, nio mo ro imowabu-ri pua.

Abera Naramu ohona kisioidiro tanaro ibo ie

²³ Mabu kitamudiro owera Abera Naramu nou aboudo ta-nomidai-ro, ina mo nio abato na-nimidirotiti, nio mo ro nouto nitamudirotiti. Nedi kitamudiro owera ro nou e, Abera Naramu Iesu nasa rubi aboto Iudasi ro edi duwo ato gapoi, iato boso urubia tu to gedea, iedi tanaro ro ido to gororosioidiro-rimo, tau keba se nou ro beredi gomidai-ro,

²⁴ taie eso owera iato garo Godi aboto. Taie beredi nou ro iato gekekeouti. Nou ro ibo, 'Nou mo durupi ie, nio sapuwo to naiwai. Nio ro idaibo sosoro tanaro ba-disioidirotiti-mo, mo kemaragoidiro sapuwo to.'

²⁵ Iedi beredi ro kiho na-giporeai-rimo ina atu tanaro Iesu ro iato gosioihiro nou ro waini obo panikere iato gomidai-ro. Nou ro ibo, 'Nedi waini obo ro na-omidiro, mo ro orio hodo nasaubiai urubia aboudo, mo karima nama-isuputi-ri. Nedi waini obo ro nio ro kidio ato, idaibo sosoro tanaro nou ba-disioihiro-titi-mo, mo kemaragoihiro sapuwo to.'

²⁶ Mabu nedi beredi ro nio ro beda tau ato kiho ra, ina waini obo beda tau ato kidio ra, idaibo ie urubia nio ro imowauti-dumo Abera Naramu na-garaburai ota kemowotowa ato, womu tato nou ina neito namadi-orowameai-ri.

Simara keremiro mea se dimeiouti-mo

²⁷ Ina noudo ie Abera Naramu edi beredi ro etio ro iho-dumo kimaragoihiro tato se, ibose nou edi waini obo ro etio ro idio-dumo kimaragoihiro tato se, Iesu edi durupi ro karima mutu neio ro ubauba emowaititi-dumo.

²⁸ Abera Naramu kiho ido to gi-osioihiro-ri, tauo kebase nio erere se modobo ie simara keremiro mea se kimeiouti, taie saro to Abera Naramu edi beredi ro waini obo mutu nato gi-imidai-ri.

²⁹ Mabu etio ro iho-dumo Iesu edi beredi ro, ibose waini obo etio ro idio-dumo, neio ro Iesu durupi mea se eibimai tato, nedi urubia ro ubauba wisa nakara se iosora-dumo.

³⁰ Ina noudo ie nio abato sirio urubia durupi pupuwo neio aboudo imese ta-garagarewado-rimo. Nio arua temeteme ro nou mabu ato iwatiti, ina arua noudo gorowaburo-rimo.

³¹ Kaupoti namabu nou e, nimo kebase keremiro kimeiouiti rasiri ie, idaibo ubauba wisa nimo ro iauri-ri pua.

³² Nimo ro mibo kainakaina na-niaurititi-dumo, Abera Naramu ro a-nimotuputiti-die, nimo umoro oititi ri ibo nimo ro ubauba nisioidirotiti-dumo. Mabu nimo Abera Naramu Iesu nu ubi ie nimo ubauba aboudo iapopo ri, ibose nu ubi tato ie nimo duriomoro tanaro urubia mutu nou ro atu se kibeouti ibo kutura, 'Nio ubauba tanaro kisioidiro urubia ie. Mo aboudo daragare-mo, era paruo to dou-mo!'

³³ Ina noudo ie mo niramio, nio atu moro to karadabu ato Abera Naramu beredi iho ri, ibose waini obo idio ri, samo to iho mamo, amia kimibiria urubia aise gi-imasebidiro-ri.

³⁴ Etio ra sogoi ro na-iwati, kebase simara moto ato simara ohona gi-iho-ri, taie saro to karadabuato ato Abera Naramu ohona nato gi-imade-ri. Nio karadabu ato modobo pua ubauba wisa iosora ri karadabu.

Mo ina nio aboto beda tau ato norowameai-die, arua owera ana-imowauti-ri nio kimaragoidiro tuputupu iwai ri.

12

Tarena Urio ro modobo iwaititi-die tanaro kisioidiro aboto

¹ Mo niramio, abora mo ubi ie nio kimowapotai Tarena Urio ro nimo kaokao se modobo na-niwaititi-die erere tanaro kisioidiro aboto, mo ubi tato ie nio nou sapuwo to karadoruti.

² Nio umoro tiamotiti ibo, nio keba se beda mino to irowomidirotiti, morobise Godi umoro oi tato na-irowomidirotiti. Abora nio etou ro giari nio neio ro edi kiwaboi ro na-giwaboi-rimo kakate gabo ato, ina owera karo tato ota titi neio imowabutiti-mo.

³ Ina noudo ie mo ubi ie nio umoro kiwai, ibo ata dubu ata Tarena Urio ro na-oworohuti nou ro ibo utura-ri pua, 'Iesu abato ubauba tanaro ba-mororosiodoro-mo.' Ibose Tarena Urio etu abato omidiro nou ro se karo ie morobise to ibo, 'Abera Naramu Iesu nou se ie.'

⁴ Abora nio mo ro a-nimowapotai Tarena Urio ro erere kimibiria urubia modobo tiwaititi-die erere tanaro kisiodiro aboto. Tarena Urio ro se iaiwotiti-die iedi tanaro ro.

⁵ Nimo ro Abera Naramu woko erere mino to nemesioidiro-titi-dumo. Ina nimo Abera Naramu kaupoti nouse ie, nou woko nemesioidiro-titi-dumo.

⁶ Kimibiria urubia ro sirio erere woko isioidiro-titi-dumo, Godi kaupoti nou se ie erere kimibiria urubia pupuwo nou ia ro se imowaititi, nou woko nimo ro na-nemesioidiro-titi-dumo.

⁷ Taie erere kimibiria urubia abato Tarena Urio ro paea se orowapotaiddiro-titi-die neio ro erere tanaro na-isioidiro-dumo kimibiria urubia meana sapuwo to.

⁸ Idaibo arua kimibiria urubia aboto Tarena Urio ro modobo ta-giwai muro owera Godi aboudo na-woutiti-dioumo imowauti ri. Ina arua kimibiria urubia aboto Tarena Urio ia ro modobo ta-giwai umoro owera Godi aboudo na-woutiti-dioumo imowauti ri.

⁹ Ina arua kimibiria urubia aboto Tarena Urio ia ro modobo ta-giwai awawo kimibiria iworohuti ri, kimibiria urubia kiwarebai aboto. Ina arua kimibiria urubia modobo ta-giwai Tarena Urio ia ro, neio ro temeteme urubia meana kiwaititi aboto.

¹⁰ Ina arua kimibiria urubia nou ro modobo ta-giwai pupuwo korosa tanaro kisioidiro aboto. Ina arua kimibiria urubia Tarena Urio ro modobo ta-giwai Godi edi ipusu oweru ro urubia kimowauti aboto. Ina arua kimibiria urubia modobo ta-giwai urio kieibimo aboto, ibo nedi tanaro ro Tarena Urio aboudo ra, o ata urio aboudo ra? Ina arua kimibiria urubia Tarena Urio ro modobo ta-giwai neio ro umoro tato oweru to urubia kimowauti. Ina arua kimibiria urubia Tarena Urio ro modobo ta-giwai nedi umoro tato oweru ro nou kiwesegere aboto, urubia umoro koi sapuwo to.

¹¹ Nedi tanaro sirio ro neio sapuwo to, Tarena Urio kaupoti nou se ie, ina nedi tanaro sirio ro nou aboudo se outiti-dioumo. Nou nakara ia se simara ubi ato erere urubia modobo tiwaititi-die.

Kaupoti durupi, sirio atemo mutu e

¹² Ina nedi oweru ro morobise ie, urubia dubu nu sirio atemo mutu sekere ie, neio kaupoti durupi rido irarebidiro-dioumo. Ina idaibo sosoro ie, Iesu edi urubia ro Abera Naramu durupi ie.

¹³ Mabu nimo atu se Tarena Urio ro ta-niwarumiauti Keriso edi kaupoti durupi ro nouto ararasoro ri. Ata nakomu tato ie nimo beda sosoro urubia ra, nimo arua Iu urubia ra o arua Iu oweru karo tato urubia ra. Arua nimo

wisa tato woko kisioidiro urubia ie. Nimo arua wisa tato woko kemesioidiro pua, simara ubi woko kisioidiro urubia ie. Kaupoti nimo atu se Godi ro ta-nidabuai, nou ro Tarena Urío nou se gemeiriai-ro, nimo niro turi ato nou ro omidiro rie. Nimo idaibo Abera Naramu edi durupi ro Tarena Urío ro osioidiro, ina abora nimo ro idaibo Tarena Urío obo nou aboudo erere se nidio-dumo.

¹⁴ Morobise ie durupi nu sirio atemo mutu e, ibo pua kaupoti atemo mutu.

¹⁵ Ata sairo pata modobo koi rasiri ie owera karo aboto, ina nou ro owera kutura ie ibo 'Mo durupi rido ateidiro pua, mabu mo tu pata pua.' Io, sairo ro idaibo owera karo rasiri ie, nou durupi rido ateidiro pua ra, a? E e, sairo durupi rido aise tateidiro.

¹⁶ Ina ibose ata gare modobo koi rasiri ie owera karo aboto, ina nou ro owera kutura ie ibo, 'Mo durupi rido ateidiro pua, mabu mo idomari pua.' Io, gare ro idaibo owera karo rasiri ie, nou durupi rido ateidiro pua ra, a? E e, gare durupi rido aise tateidiro.

¹⁷ Ina ma-dimaragoidiro-mo, durupi ato idomari iopu se ma-mateidiro ata nakomu tato, ina owera etou nakomu to kirowidiro ra? Ina ibose durupi ato gare se ma-mateidiro ata nakomu tato, ina nibo beda nakomu to kimasio ra?

¹⁸ Kaupoti auna owera nou e, Godi ro nimo durupi mea se nimesioidiro erere nakomu nimo nou ro simara ubi moro ato mea se nimadebuti.

¹⁹ Erere nakomu nimo nou ro durupi ato kimadebuti tato rasiri ie, nou ro kaupoti namo

kimadebo rasiri ie, durupi boira? Imese ba-gararaseperai!

²⁰ Kaupoti, durupi ibo owamo pua. Durupi nou sirio atemo mutu e, ina iedi durupi ro kaupoti nouse ie.

²¹ Ina noudo ie idomari ro modobo pua ibo kutura tu aboto, 'Mo oro ro owarebai-ri pua. Mo nakara se korowarebai modobo ie.' Ibose eputa ro modobo pua ibo kutura sairo aboto, 'Mo oro ro owarebai-ri pua. Mo nakara se korowarebai modobo ie.'

²² E e. Arua atemo durupi ato na-iateidiro nimo pupuwo tato nakomu to na-niasoro-dumo, awawo woko kisioidiro modobo pua. Kaupoti iedi atemo ro dorogora se atemo pua. Urubia dubu ro iedi durupi atemo ro durupi rido kiasio ato, nou morobise to ama-araburai-ri, pamo ie iedi durupi ro.

²³ Arua atemo durupi ato na-iateidiro, nimo ro na-niasoro-dumo ibo awawo nakomu pua, nimo ro mea se niaurititi-dumo. Ina arua atemo durupi ato na-iateidiro, urubia ro modobo pua kiauri, nimo ro mea se kiwasiai ie obotama to.

²⁴ Durupi ato edi nakomu ro paease na-iamo, nimo ro auna se imaragoidiro-ri pua. Kaupoti durupi momuo se Godi nakara se ie nou ro nimesioidiro, erere nakomu nou ro nimadebuti durupi ato na-iamo. Beda durupi sapuwo ra nimo ro masiro tato to na-niasoro-dumo, neio masiro Godi ro auna ta-giwai.

²⁵ Godi ro nou mabu ato gisioidiro, modobo pua durupi ato edi na ro orowotoi, neio nakara se karapeputi. Godi ubi ie imese beda mutu

kemadebuti nakomu ra, neio atu se nirimagare eremati rie karapeputi tato.

²⁶ Ata durupi nakomu ata ro temeteme na-iwia, iedi durupi rido na-iateidiro, neio imese temeteme ro ibose to kirobai ie. Durupi ato edi erere nakomu ro na-iamo, neio ata ro auna masiro na-omidai, durupi ato edi na iateidiro neio imese kamade aise koi ie.

²⁷ Taie nio mo ro a-nimowapotai nio durupi ato edi na orowotoi, Keriso edi durupi ro neito ararasoro-dumo.

²⁸ Ina Godi edi urubia ro neio abato nou ro kebase neio gimagerai, Iesu ro kitiodorai urubia girapoi. Neio saro gabo ato nou ro Godi ipusu oweru urubia girapoi. Ina neio saro ato Godi oweru kitamudiro urubia girapoi. Ina neio saro gabo ato pupuwo korosa tanaro kisioidiro urubia girapoi. Ina neio saro gabo ato temeteme urubia meana kiwaititi urubia girapoi. Ina iato arua urubia kiwarebai urubia girapoi. Ibose nou ro Iesu urubia kiwabo i urubia girapoi. Ina nou ro arua urubia girapoi umoro tato oweru to kimowauti.

²⁹ Nio umoro ie ibo, nimo sirio se Iesu kitiodorai urubia to ararasoro-ri pua, sipu tato urubia giapoi. Nimo sirio se Godi ipusu oweru urubia to ararasoro-ri pua, sipu tato urubia giapoi. Nimo sirio se Godi oweru kitamudiro urubia to ararasoro-ri pua, sipu tato urubia giapoi. Pupuwo korosa tanaro imese sirio urubia abato iamo-ri pua, sipu tato urubia abato giamo.

³⁰ Nio imese sirio se temeteme urubia meana kiwaititi urubia to ararasoro-ri pua, sipu tato urubia giapoi. Nio imese sirio se a-giapoi ra

umoro tato owerā to urubia kimowauti? E e, sirio se iapoi pua. Nio imese sirio se a-giapoi ra umoro tato owerā kiwesegere aboto? E e, sirio se iapoi pua.

³¹ Iedi tanaro ro neio maumo ato kimibiria borubi auna se na-iwarebai-dumo, modobo ie nio abato auna ubi ro kiamo idaibo tanaro kisioidiro aboto. Ina abora nio mo ro anama-imowapotai-ri meana ia gabo boido aidiro-die.

13

Urubia nirimagare kimati auna tanaro ie

¹ Umoro tato owerā, daimodaimo urubia ro na-iaro-dumo, ibose Godi sowake urio ro na-iaro-dumo, mo ro neito karo ato, kaupoti urubia mo ro nirimagare kimati tato, mo ro kimowauti owerā kapokere diamo sosoro ie.

² Mo Godi ro modobo kowaititi ato nou ipusu owerā kimowauti aboto, ibose umoro urubia abato kiamo tato, Godi abato piro se na-iamo-die, mo abato nedi umoro ro kiamo ato, Godi edi umoro sirio ro neio mutu, ibose mo abato auna kimibiria kowamo ato, podo mo ro kemowapotai ie, ioudo karaubai ie ata moro ato kotobowa ie. Io, idaibo tanaro morobise to kororosioidiro ato, kaupoti urubia mo ro nirimagare kimati tato, mo niro turi ato ata mea nakomu ata owamo-ri pua.

³ Mo ro namabu tato urubia namabu kimio ato, ibose mo durupi kararapoi ato era ro kouho aboto, kaupoti urubia mo ro nirimagare kimati tato, mo ro ata mea wisa ata owea-ri pua.

⁴ Nirimagare urubia dubu abato na-owamo, nu serawo samo to oi-ri pua. Nirimagare urubia dubu abato na-owamo, nou ro urubia mea se kiwarebai ie. Nirimagare urubia dubu abato na-owamo, nou arua urubia nakomu aboto imaragoidiro-ri pua. Nirimagare urubia dubu abato na-owamo, nu eremowabu-ri pua.

⁵ Nirimagare urubia dubu abato na-owamo, nu siripo tanaro isioidiro-ri pua. Nirimagare urubia dubu abato na-owamo, nu nakara se eremaragoidiro-ri pua. Nirimagare urubia dubu abato na-owamo, nou arua urubia ro masawe samo to owai-ri pua. Nirimagare urubia dubu abato na-owamo, arua urubia beda ubauba tanaro isioidiro-dumo nou aboto, nou ro imaragoidiro-ri pua.

⁶ Nirimagare na-owamo urubia dubu abato, nou kamade tato ie ubauba tanaro kiauri aboto. Kaupoti nu kamade ie urubia ro Godi edi morobise owera ro na-ibodoro-dumo.

⁷ Nirimagare na-owamo urubia dubu abato, koko tau na-wou-dioumo nou huru to orowame-ri pua, meamea tanaro aise kisioidiro ie. Nirimagare urubia dubu abato na-owamo, kimibiria nou ro aseperai-ri pua, nou abato aise ama-owamotiti-ri. Nirimagare urubia dubu abato na-owamo, nou ro kimaragoidiro to kiauri ie ibo meamea tanaro ro amadimo-ororosioioidiro-ri. Nirimagare urubia dubu abato na-owamo, koko tau na-wou-dioumo nu koko se kiwotoi ie.

⁸ Nirimagare womu tato ie, nu aise ororuwotiti-die. Kaupoti Godi ipusu owera kimowauti tanaro, saiki ata ama-oroporeai-ri.

Umoro tato owera to urubia kimowauti tanaro, saiki ata ama-oroporeai-ri. Umoro owera Godi aboudo kimowauti tanaro, saiki ata ama-oroporeai-ri.

⁹ Iedi umoro owera kimowauti tanaro ro, ibose Godi ipusu owera kimowauti tanaro, abora Godi ro nimo aboto nou morobise owera momuo se nedi tanaro teibo ro nouto iwawuti pua, sapuwo se nimowawuti-die.

¹⁰ Kaupoti womu tau nimo aboto beda tau ato namadi-orowateai-ri, imese tanaro mea ia se nato amadimo-ororosioi-di-ro-ri, nedi sapuwo tanaro ro neio sirio se imese amadimo-oroporeai-ri.

¹¹ Mo kainai na-nimidirotiti, mo owera merebusere kainakaina sosoro niarotiti. Ibose mo kimaragoidiro, merebusere kainakaina mino to nimaragoidirotiti. Mo auna na-noi dubu to na-nararapoi, mo ro nedi kainakaina urubia ro, neio edi tanaro ro mo ro aise nimesere.

¹² Abora nimo ro Godi timotimo garasi to idaibo sosoro niauri-dumo. Kaupoti ido nu nimo mutu sosoro paea se anamadimo-ororowea-ri. Godi sapuwo to abora mo umoro egea mere se owamo, ido nou mo ro umoro momuo se nato anama-oi-ri. Mo sapuwo to Godi ro beda sosoro umoro momuo se na-oworohuti-die, mo umoro nato anama-oi-ri.

¹³ Ina owera koporeai aboto, netewa didi awawo tanaro peteibi neibi ro iamotiti-biwai ri, kimibiria kiworohuti, kimaragoidiro to kiauri ie meamea tanaro amadimo-ororosioi-di-ro-ri, ibose nirimagare kimati. Kaupoti auna ia nakomu nedi netewa didi tanaro peteibi ro neibi maumo

ato na-owamo nou e, urubia nirimagare kimati.

14

Godi oweru urubia umoro oweru to kimowauti

¹ Urubia nirimagare kimati gabo kaupoti nou se ba-dobodoro-mo. Tarena Urio ro kimibiria urubia modobo ta-iwaititi erere tanaro kisioidiro aboto. Modobo ie nio abato auna ubi ro kiamo nedi tanaro ro neio kisioidiro aboto. Godi ipusu oweru kimowauti aboto nio abato auna ia ubi ro ba-miamo.

² Mabu ata dubu nou ro modobo kowai ie umoro tato oweru to kimowauti aboto, ina nou ro iedi oweru to aro, Godi ia emowauti, urubia ro maumo mea se omidai-ri pua. Morobise ie kimowauti dubu ro urubia imowauti-ri pua. Nou ro edi oweru to imowauti, kebase piro se na-owamotiti Godi abato, Tarena Urio ro iaiwotiti-die.

³ Kaupoti Godi ipusu oweru etio ro imowautiti-dumo, neio edi oweru ro tuputupu ia se ou-dumo urubia aboto. Neio edi ipusu oweru ro na-imowauti-dumo, neio ro nouto iwarebai-dumo kimibiria urubia kiroromai sapuwo to. Ibose neio ro nouto kimibiria pupuwo imowaititi-dumo. Kimibiria urubia mibo na-iauri-dumo, neio ro kiarumiauti nedi ipusu oweru ro nouto.

⁴ Ina beda dubu ra umoro tato oweru to na-imowauti, nou kimibiria pupuwo nakara se orowaititi, Iesu edi urubia ro nou ro pupuwo iwaititi-ri pua. Kaupoti Godi edi ipusu oweru ro etio ro imowauti-dumo, Iesu edi urubia sirio ro neio ro kimibiria pupuwo iwaititi-dumo.

⁵ Mo ubi sekere ie nio imese umoro tato owerato kimowauti. Kaupoti auna ia nakomu nou e, mo ubi ie nio ro Godi edi ipusu owerato urubia kimowauti. Godi ipusu owerato etio ro imowauti-dumo, neio awawo tanaro kisioihiro urubia ie. Etio ro imowautiti-dumo umoro tato owerato, nedi urubia ro neio sosoro pua, neio ro Godi urubia auna se iwarebai-ri pua. Umoro tato owerato urubia etio ro imowautiti-dumo, ina kiwesegere dubu tato, nedi urubia ro neio simara kimowauti oweramaumo mea se kiwesegere modobo ie, Iesu urubia mea se kiroromowado sapuwo to. Idaibo tanaro kororosioihiro ato, nedi umoro tato owerakimowauti dubu ro nou Godi ipusu owerakimowauti dubu sosoro ie.

⁶ Mo niramio, mo nio aboto kou ato, nio umoro tato owerato kimowauti ato, nio idaibo mo ro mea se kiwarebai ra? E e, nedi owerato nio nou ro iwarebai-ri pua. Kaupoti mo ro korowauti ato Godi ro beda oweranemowauti-ro, o umoro owerato Godi aboudo mo ro kimowauti ato, o Godi edi ipusu owerato kimowauti ato, o ata kitamudiro owerato Godi aboudo mo ro kimowauti ato, nio nedi tanaro sirio ro neio ro kiwarebai ie.

⁷ Ibose ba-dimaragoidiro-mo, nou idaibo sosoro ie keremiro tato namo teibo beda sosoro ra gita ra ugeuge ra beda diamo isioihiro-titi-do. Kiado urubia ro o kiourio urubia ro diamo mea se kiwapotai tato, iedi tau ro nato kirowidiro urubia ro umoro oi-ri pua iedi ohare diamo ro.

⁸ Humuko diamo mea se kou tato boso urubia beda sosoro keremodiai ra boso aboto kaimowado ato?

⁹ Ina atu sosoro tanaro nio ro tisioidiro-dumo. Nio karadabu ato urubia umoro tato oweru to na-imowauti-dumo, nedi oweru ro urubia ro maumo beda sosoro amadimo-oi-ri? Nio ro urubia imowauti pua, nio ro moto goro emowauti-dumo.

¹⁰ Morobise ie nedi sopo duriomoro gebari ro nato, erere oweru imese sirio ia ie, neio erere se maumo mutu e.

¹¹ Kaupoti mo umoro tato oweru to ata dubu ata ro mo namadi-emowauti-ri, mo iato daimodaimo dubu to nou ro anamadi-apoi-ri, ina nu mo ro daimodaimo dubu to nama-apoi-ri.

¹² Ina idaibo sosoro tanaro kororosioiro ie, nio abato umoro tato oweru to kimowauti ato. Nio abato auna ubi ro iamo Tarena Uriu ro modobo kiwaititi erere tanaro kisioidiro aboto. Ina noudo ie Tarena Uriu aboudo beda tanaro ra Iesu urubia pupuwo auna se na-iwaititi-dumo, nedi tanaro ro kisioidiro aboto nio ubi auna ia ba-diwaititi-mo.

¹³ Ina noudo ie nio ata ro umoro tato oweru to kimowauti ato, nou ro modobo ie Godi kararatoro korosa omia ri, iedi oweru ro maumo mea se kiwesegere aboto.

¹⁴ Mo ro Godi aboto karo ato umoro tato oweru to, mo edi urio ro nou ro karo ie. Kaupoti mo kimaragoidiro ro ata kiwarebai tanaro ata osioidiro-ri pua.

¹⁵ Ina noudo ie mo iato beda mino to nama-orowati-ri? Ata tau mo ro urio to umoro tato oweru to nama-aro-ri Godi aboto. Ina ata tau mo ro kimaragoidiro to anama-aro-ri Godi aboto. Mo wasare urio to anama-iwati-ri, ina wasare mo ro kimaragoidiro to ibose to anama-iwati-ri.

¹⁶ Nio ata ro umoro tato owera to urio to Godi nama-emowabu-ri, ina arua urubia iato na-orowomidiro-die, neio umoro oi-ri pua nou beda owera to emowabu. Nou edi kararatoro owera ro koporeai ato, neio ro modobo pua atu se nato kutura, 'Ibose ba-mororosioidiro-mo.'

¹⁷ Etu umoro ra nio ata ro Godi aboto eso owera mea se aro, kaupoti arua urubia nou ro pupuwo iwaititi-ri pua.

¹⁸ Godi aboto mo ro eso owera naro, mabu mo umoro tato owera to auna se niarotiti, nio ro umoro tato owera to auna se iarotiti pua.

¹⁹ Iesu urubia mo mutu atu moro to karadabuai ato, mo ubi ie 5 owera se karo urubia simara owera to kimowauti, neio kitamudiro aboto. Mo ubi tato ie 10,000 owera umoro tato owera to kimowauti, neio iwarebai-ri pua.

²⁰ Mo kimibiria naminiramio, nio Tarena Urio ro edi mino to modobo na-iwaititi-die erere tanaro kisioidiro aboto, nou sapuwo to na-imaragoidiro-dumo, merebusere kainakaina sosoro kimaragoidiro ba-dimeserai-mo. Awawo urubia sosoro gi-imaragoidiro-ri. Ibose bamuai kainakaina ro ubauba tanaro kisioidiro pua, neio sosoro gi-orowomidiro-ri ubauba tanaro kisioidiro tato.

²¹ Tarena Buka ato Abera Naramu ro owera kebase ta-gowapotai-ro ibo, *Mo simara urubia aboto daimodaimo urubia nama-imerio-ri, mo urubia neio ro umoro tato owera to amadimi-imowauti-ri. Kaupoti mo urubia ro mo owera daimodaimo urubia aboudo irowidiro-ri pua.*

²² Ina noudo ie, kimibiria tato urubia aboto Godi oweru karo ie neio umoro tato oweru to, paease kiwauti aboto ibo nedi urubia ro nou oweru kimibiria tato urubia ie. Kaupoti kimibiria urubia aboto Godi ipusu oweru kimowauti ie, ibo pua kimibiria tato urubia aboto.

²³ Etu umoro ra Iesu patu urubia nio atu moro to karadabuai ato, ina nio ro umoro tato oweru to namadimi-imowauti-ri, Iesu gabo umoro tato urubia iato na-orowomidiro neio umoro oi-ri pua. Nedi urubia ro amadimi-imaragoidiro-ri ibo nedi urubia ro kawakawa urubia ie.

²⁴⁻²⁵ Kaupoti etu umoro ra nio imese Godi edi ipusu oweru ro simara ia oweru to na-imowauti-dumo, ina kimibiria tato dubu nato na-ou-die, nou nakara se kerereibimai ie ibo, 'Morobise ie, mo ubauba tanaro kisioidiro dubu e.' Godi aboto aise ama-iroborea-ri nou kemowabu sapuwo to. Mabu nio imese Godi ipusu oweru simara ia oweru to imowauti-dumo, ina edi ipusu oweru sirio ro nou ama-imeiouiti-ri. Nedi dubu ro beda ubi tanaro ro iamo piro se nou niro turi ato, morobise to Godi ro nato amadi-iwapotaidiro-ri. Nou ro ibo ama-aro-ri, 'Morobise ie, Godi nio kimibiria urubia abato tomidiro!'

Kimibiria urubia ro Godi mea se kemowabu

²⁶ Ina noudo ie niramio, beda tanaro kisioidiro ra? Ibo kisioidiro modobo ie, nio atu moro to karadabuai ato, ata ro wasare kiwati ie Godi aboto, ina ata ro ata kitamudiro oweru kimowauti ie. Ina ata ro korowauti ie nu Godi ro beda oweru gemowauti, ata mere ro korowauti

ie umoro tato owera to, ina nu edi owera ro ata ro kiwesegerai ie urubia umoro owera to. Kaupoti nedi tanaro sirio ro nou kisioidiro ato, modobo ie imese Iesu urubia neio pupuwo kiwaititi sapuwo to.

²⁷ Urubia umoro tato owera to kimowauti ato, netewa teibo o netewa didi na peteibi ro neibi ro se erere se kimowauti modobo ie. Ina neibi ro beda owera to aro-bimo, nio ata ro neibi owera ba-miwesegere.

²⁸ Iedi moro ro nato kiwesegere dubu ata pоторo ato, iedi na peteibi ro aise otobowa mamu, neibi modobo ie matagoro kiopai se korowomidiro. Neibi nakara se eputa ato keremowauti ie, ibose Godi aboto korowauti ie.

²⁹ Ibose Godi edi ipusu owera ro kimowauti ato, netewa teibo dubu teibo o netewa didi dubu peteibi neibi ro se kimowauti modobo ie. Neibi edi ipusu owera ro nio ro mea mino to ba-dimodobowauti-bimo.

³⁰ Ata komidiro dubu nu Godi ro ata owera kemowauti ato, kimowauti dubu nato aise korodiobo ie, ina modobo ie komidiro dubu ro nou bobo korobai ie.

³¹ Godi ipusu owera etio abato na-iamo, urubia atu tau ato owera iwasoro mamu, neio modobo ie kaokao se kiwasoro. Io idaibo mino to kororosoidiro ato urubia sirio se mea se amadima-aratamudi-ro-ri, ibose pupuwo amadimo-oi-ri.

³² Nou se dimaragoidiro-mo, Godi ipusu owera etio ro imowauti-dumo, neio ibo aro-ri pua 'Mo nato orodiobo-ri pua, mabu mo gabo tato ie'. E e. Nou ro Godi ipusu owera kimowauti ato, nou

simara ubi ato katamuai ie, ina simara ubi ato koporeai ie.

³³⁻³⁴ Mabu nou e korowakopeamuti tanaro Godi aboudo ou-ri pua, nou ubi ie Iesu urubia ro tanaro mea se kisioidiro, miro nou aboudo ou-die.

Nio karadabu ato, mamio ro modobo pua dorogora owera karo. Iesu urubia beda moro ato iradabu-dumo, nedi tanaro ro neio ro tirobidiro-dumo. Mabu Iu urubia sabi maumo ato idaibo owera tiamo, iedi urubia ro iwaboi-dumo Godi owera to, mamio ro modobo ie neio owera se kirowidiro.

³⁵ Mamio ubi na-iamo owera umoro mea se koi aboto, neio ro modobo ie simara moto ato uramio kiraratoro, ina neio umoro uramio ro amadimi-iwaititi-ri. Mabu mea tanaro pua mamio dorogora owera karo Iesu urubia karadabuai maumo ato.

³⁶ Korini urubia, Godi edi kitamudiro ro nio aboudo aratamuai pua, ibose nio aboto se orowateai pua.

³⁷ Nio etio ro imaragoidiro-dumo, 'Nimo Godi ipusu owera kimowauti urubia ie', o 'Nimo Tarena Urio ro modobo ti-niwaititi erere tanaro kisioidiro aboto,' nio nakara se keremasibai modobo ie ibo, mo ro nedi owera ro nio aboto na-nisoidiro, io Abera Naramu sabi owera ie.

³⁸ Nedi owera ro beda urubia ro iseio-dumo, neio ibose Godi ro amadi-iseiai-ri.

³⁹ Ina noudo ie mo niramio, morobise ubi nio abato ba-mowamo Godi ipusu owera kimowauti aboto. Ibose arua urubia idiobuti mamu umoro tato owera to kimowauti.

⁴⁰ Kaupoti nio karadabu ato, imese tanaro mea mino to gi-isioidiro-ri.

15

Iesu pamo rido na-gowameai-ro

¹ Mo niramio, mo ubi ie nio kimaragoidiro ina kiwameai aboto mea owera Iesu sapuwo to nio mo ro na-nimowautiti. Nedi mea owera ro nio ro ta-gimibiria-rimo, pupuwo se nou ato tiwotoi-dumo.

² Nedi mea owera ro ioudo aise namadimi-irarebidiro-ri, idaibo sosoro ie nio nou ro ubauba aboudo tiapopotiti-die. Nio nou aboudo kirarebidiro tato, nio kimibiria tanaro mutu orowaguvoidiro-dumo.

³ Mabu mo ro beda owera nomidai-ro, imese auna ia owera ie Abera Naramu ia ro mo kebase nemowauti-ro, ina nio aboto aise norowautiti. Mo ro nedi owera ro nou nomidai, nou sapuwo to Tarena Buka ato owera keba ia se ta-gowapotai-rimo ibo, Keriso ta-garaburai nimo ubauba sapuwo to.

⁴ Nadi bobo to ta-gibiria-rimo ina pamo rido nato gowameai-ro netewa teibo saiki na-goroporeai-rido. Tarena Buka ato owera tiamo nedi tanaro ro kororosoidiro sapuwo to.

⁵ Keriso kebase Pita aboto gorowapotai-ro, ina nu 12 kowasoro urubia aboto iato gorowapotai.

⁶ Nou wapo gabo ato, nu ina sosoro 500 kimibiria urubia mako ta-gorohodorai-ro neio aboto gorowapotai-ro. Nedi kowasoro urubia aboto na-gorowapotaiddiro-ro, sipu tato ta-gorowaburo-rimo, ina sirio mere se

torowomidiro, mo ro nedi peba titi ro nedi tau ro nato nisioidiro.

⁷ Iesu ibose Iemisi aboto ta-gorowapotai, ina nou saro gabo ato nu ibose imese kitiodorai urubia aboto gorowapotai.

⁸ Ina mo iana ia dubu e, Iesu mo aboto nato gorowapotai-ro. Bamuai nou morobise tau ato koroto tato, ata tau ato na-oroto, mo urio to idaibo mino to noroto. Iesu kitiodorai urubia neio auna masiro mutu e, mo marasio, masiro tato dubu e.

⁹ Mo Iesu ro kotiodorai dubu to kararasoro modobo pua, mo imese ubauba ia dubu e. Mabu mo ro Iesu urubia kiado to ubauba ta-niwaititi.

¹⁰ Kaupoti Godi edi wisa tato nirimagare ro, mo meana nou ro nowai, mo abora nou e, nu edi wisa tato nirimagare ro mo abato kowamo kawa owamo pua. Mo woko arua kitiodorai urubia sosoro isioidirotiti pua. Neio ro auna woko ta-isioidirotiti-mo. Kaupoti mo ro auna ia woko nisioidirotiti. Nedi woko ro mo ro na-nisioidirotiti, ibo pua mo simara pupuwo to kisioidiro, mabu Godi edi wisa tato nirimagare ro mo abato ta-gowamo, nou ri nisioidiro nedi woko ro.

¹¹ Kaupoti auna tanaro pua, Iesu edi mea owera ro nio mo ro a-nimowauti ra, o arua kitiodorai urubia ro a-imowauti-dumo ra? Auna owera nou e, nimo ro atu se Iesu edi mea owera ro na-nimowautititi-dumo, nio ro ta-gimibiria-rimo.

Iesu Godi ro pamo rido kowameai tato rasiri ie

¹² Abora nimo kitiodorai urubia ro ibo na-nimowauti-dumo, Keriso Godi ro pamo rido

ta-gowameai-ro. Ina mabu boira nio arua ro ibo na-iaro-dumo pamo urubia Godi ro pamo rido iwame-ri pua?

¹³ Urubia pamo rido kiwame tato rasiri ie, Keriso pamo rido Godi ro owameai pua, nou pamo a-sorobu.

¹⁴ Ibose Keriso pamo rido kowameai tato rasiri ie, nimo ro Iesu sapuwo to urubia edi owera to na-nimowautiti-dumo, ba-norowaguwoiro-mo. Ina nio edi kimibiria ro na-gimibiria-rimo ba-gorowaguwoiro-rimo.

¹⁵ Ina ata owera kadabuai aboto nou e, pamo urubia bobo rido kiwame tato rasiri ie, nimo kitiodorai urubia paea se ba-norowapotai-rimo ibo nimo Godi sapuwo to karasaubuti owera karo urubia ie. Mabu nimo kitiodorai urubia ro nimowautiti-dumo ibo Keriso Godi ro pamo rido ta-gowameai-ro. Kaupoti pamo urubia Godi ro pamo aboudo kiwame tato rasiri ie, Keriso nou ro pamo rido owameai pua, pamo se ba-sorobu, ina nimo ro karasaubuti owera ba-nimowautiti-mo.

¹⁶ Mabu pamo urubia Godi ro pamo rido kiwame tato rasiri ie, Keriso ia pamo rido nou ro owameai pua.

¹⁷ Ina Keriso pamo rido kowameai tato rasiri ie, nou idaibo ie nio ba-gorowaguwo-rimo, ina nio edi ubauba ro Godi ro imatopeamuti pua, nio abato ba-siamo.

¹⁸ Ibose etio ra na-gorowaburo-rimo Keriso edi mea owera ro nato na-gimibiria-rimo, neio Godi aboudo imese moro to ba-garatowouti-rimo.

¹⁹ Nimo Keriso sapuwo to kimibiria rasiri ie

ibo, nedi duriomoro keremiro ro nou sapuwo to se Keriso ro kiwarebai, ina korowaburo ato nimo ata kiwarebai tanaro ata Keriso aboudo owea-ri pua, natonato babio. Io idaibo kimibiria nimo ro kiworohuti rasiri ie, ubauba nimo abato auna ia se ba-siamotiti. Idaibo ubauba, arua urubia abato iamo-ri pua. Nimo neio ro natonato ba-nimati-mo.

Mabu boira Iesu pamo rido kowameai?

²⁰ Kaupoti morobise owera nou e, Keriso morobise to pamo urubia aboudo Godi ro ta-gowameai-ro. Nu keba dubu e nedi tanaro ro Godi ro nou ri gosioidiro nimo umoro niwai-ro ibo, etio ro gorowaburo-rimo kimibiria mutu neio Godi ro pamo rido ama-iwame-ri.

²¹ Pamo nimo aboto Adam ro gowodoro-ro, nou ro gowasomai ubauba, ibose pamo rido kiwame kaupoti dubu aboudo garatamuai-ro, edi dubu ro Iesu nou se ie.

²² Nimo nedi duriomoro ro nato na-norowomidiro Adam keremiro maumo ato, nimo korowaburo urubia ie. Ina atu sosoro tanaro ie nimo Keriso edi keremiro ro nou maumo ato na-norowomidiro, womu tau ato nimo Godi ro morobise to pamo rido anamadi-iwameai-ri.

²³ Kaupoti urubia pamo rido kiwameai ato, simara tau ato amadi-iwameai-ri. Keriso ro gatamuai pamo rido korowame tanaro. Ina nu korowameai tau ato nu simara urubia pamo rido nato amadimo-orowameai-ri.

²⁴ Ina nou saro gabo ato, womu tau nato amadi-ereredeai-ri. Edi tau ro nato nou ro keba se duriomoro beda ubauba urio ro

egedioutititi-dumo, nou ro ubauba ama-iwai-ri, eputa urio to edi urio ro ararasoro-dumo iato neio ie, Iesu ro neio ubauba ama-iwai-ri. Ubauba urio neio pupuwo na-imadetiti-dumo, Iesu ro neio ubauba ama-iwai-ri. Ina Godi ro kiwaboi tanaro Iesu ro nato ama-iwameai-ri, Abera Godi aboto.

²⁵ Mabu Keriso modobo ie nu eputa dubu to komidiro, womu tato nu nasa urubia sirio neio wagoha to kituti.

²⁶ Iana ia nasa dubu nou masiro ie pamo, Iesu ro imese ubauba ama-owai-ri.

²⁷ Mabu owera keba se Tarena Buka ato ta-gowapotai-ro ibo, *Godi ro imese namabu nou sairo mabu ato ta-giedea nou ro iauri ri*. Ibo pua Godi nou ro kadabuai Iesu ro iauri ri, e e Godi Iesu ro iauri-ri pua.

²⁸ Abera Godi ro Iesu pupuwo korosa nama-omia-ri, nou ro imese namabu sirio kiauri dubu to kararapoi aboto, iedi tau ro nato nou Godi edi pupuwo korosa ro nou maumo to ama-odoro-ri. Ina imese tanaro sirio Godi ia ro ama-iauri-ri.

Urubia Godi ro pamo rido kiwame tato rasiri ie

²⁹ Korowaburo urubia Godi ro pamo rido kiwame tato rasiri ie, ina amia urubia obo to na-iwarumiauti-dumo, simara sapuwo to iwarumiautiti pua, keba se edi urubia ro gorowaburo-rimo neio sapuwo to imadetiti-dumo. Kaupoti pamo urubia pamo rido kiwame tato rasiri ie, obo to kiwarumiauti pamo urubia sapuwo to, ina mabu boira pamo urubia sapuwo to obo to na-iwarumiauti-dumo? Neio beda sosoro kiwarebai ra?

³⁰ Ina ower a neibi sapuwo to beda sosoro ra? Godi ro korowaburo urubia pamo rido kiwame tato rasiri ie, mabu boira sirio saiki neibi arua kitiodorai urubia mutu temeteme aboto durupi aise na-niaidodorowado-bimo?

³¹ Mo niramio, sirio tau mo urubia ro opia ri ta-nemahuwotiti-mo, kaupoti mo ata tere tato ie neio ro kopia. Nedi ower a ro dese na-niatiti, nou morobise ower a ie. Ina atu sosoro morobise ower a nou e. Mo kamade ie nio sapuwo to nimo Abera Naramu Iesu Keriso nou keremiro maumo ato na-norowomidiro.

³² Epesesi sabowa ato giro to edi urubia ro ararasorotiti-dumo, mo neio mutu na-niradotiti sopu duriomoro wisa nou ia se komidai sapuwo to rasiri ie, nedi tanaro ro na-nisioidiro mo neio ro owarebai-ri pua. Korowaburo urubia pamo rido kiwame tato rasiri ie, ina kimibiria tato urubia ower a se ba-nibodoro-mo, idaibo, 'Kiho kidio woko se nimo ro misioidiro-rimo, mabu kowaroho nimo imese moro to korowaburo aboto ie.'

³³ Nio arua urubia ro kisaubuti modobo pua. Nio ubauba urubia mutu karadabu ato, nio ubauba neio ro amadimi-iwai-ri.

³⁴ Kimaragoidiro tato tanaro dimeserai-mo, mea kimaragoidiro aboto dorowameai-rimo. Mabu nio arua iato na-orowomidiro, Godi umoro tato urubia ie. Mo ro nedi ower a ro na-naro, mo ubi ie nio siripo kiwai.

Nimo durupi beda mino to namadimi-iworohuti-ri

³⁵ Etu umoro ra arua urubia nio abato torowomidiro, idaibo kararatoro ower a neio abato tiamo, ibo, 'Pamo urubia Godi ro beda

mino to amadi-iwame-ri? Neio durupi beda sosoro to amadimi-iwotoi-ri?’

³⁶ Nedi kararatoro oweru ro imese daradara kararatoro oweru ie! Mabu nio ro ota iopu goto ato na-iwoumudirio-dumo, iedi ota iopu ro kau keremapusiti ie. Tauo edi ota iopu ro kebase korowaburo ie, kau ido to keremapusiti ie kiroromai sapuwo to. Kaupoti neio goto maumo ato atu sosoro irobu-ri pua, neio ina koroiwauti ie.

³⁷ Nio ro edi kono iopu ro kibouti ra, io dorogora kono iopu e, ido neio kisuwoduti ato, kono to kararapoi ie.

³⁸ Kaupoti Godi ia nakara se simara ubi to, iopu nou ro erere durupi keremiro nato kimio ie.

³⁹ Beda mutu namabu ro oroho-dumo neio durupi atu sosoro pua, erere durupi mutu e. Urubia durupi ata sosoro ie, tu ra sairo ra to koroho nakomu neio durupi ata sosoro ie, pawa ata sosoro ie, nakere ata sosoro ie.

⁴⁰ Toboro ato edi namabu sirio ro na-iamo, neio simara durupi mutu e. Sopu duriomoro ato edi namabu sirio ro na-iamo, neio ibose simara durupi mutu e. Kaupoti toboro ato neio edi sosoro ro namadimi-iwapotai-ri, ata meana ie. Ibose sopu duriomoro ato neio ibose simara mea erere sosoro amadimi-iwapotaidiro-ri.

⁴¹ Saiki sosoro simara mea woroworo owapotaiddiro-titi-die, ibose sogomi simara mea woroworo owapotaiddiro-titi-die. Kiboni ibose mea woroworo mutu e, erere kiboni neio erere mea woroworo mutu e.

⁴² Ina atu sosoro ie urubia pamo rido Godi ro

nama-iwameai-ri, beda pamo dubu durupi kibiria ra bobo to, nedi durupi ro kepuse ie. Kaupoti beda durupi ra Godi ro pamo rido namadi-iwameai-ri, neio modobo pua pamo kowea aboto, womu tato womu tato keremiro to ama-irowomidiro-titi-ri.

⁴³ Beda pamo durupi kibiria ra bobo to, nou mea sosoro mutu pua, ubauba ie. Kaupoti beda durupi ra Godi ro pamo rido namadi-owameai-ri, nu imese meana ia sosoro to korowapotai ie. Beda durupi ra goto maumo to kowoumudurai ato, ata nakomu ata iwati-ri pua. Kaupoti nou durupi pamo rido Godi ro namadi-owameai-ri auna ia pupuwo komia ie.

⁴⁴ Iedi durupi kowoumudurai ra, sopu duriomoro durupi kowoumudurai ie. Nu Godi ro kowoubua ato, nu urio durupi komia ie. Urubia ro kebase sopu durupi kiwomidiro ie, ina saro to urio durupi kiwomidiro ie.

⁴⁵ Tarena Buka ato oweri ibo ta-gisioidiro-rimo, 'Keba dubu Adam, *Iawe Godi ro gomia keremiro, taie nou keremiro dubu to aise gararapoi.*' Ina iana Adam, Keriso nou se ie, nou keremiro kimio urio to gararapoi.

⁴⁶ Ba-dimaragoidiro-mo, Iesu edi urio ro Godi ro orio durupi na-gomia, nou kebase omidiro pua nedi duriomoro ro nato. Keba dubu Adam goto rido Godi ro na-gosioidiro, nou kebase ta-gomidiro nedi duriomoro ro nato. Iato nou saro gabo ato, Iesu urio orio durupi mutu gomidiro.

⁴⁷ Keba dubu nu goto rido gosioidiro, ina nou sopu duriomoro dubu e. Saro dubu nou edi orio

durupi ro Godi ro na-gaiwai-ro, Adiri sabowa rido gou-ro.

⁴⁸ Keba dubu durupi beda muro to gosioidiro goto rido, ina atu sosoro ie, imese sirio urubia nedi sopu duriomoro ro nato na-orowomidiro, neio durupi goto rido gisioidiro. Kaupoti Adiri sabowa ato etio masiro ro iato na-iateidiro, beda dubu ro gou-ro neito Keriso, neio nou sosoro ama-irowomidirotiti-ri.

⁴⁹ Nimo sopu duriomoro urubia dubu sosoro mutu norowomidiro, saiki ata nimo Adiri sabowa dubu, nimo nou sosoro anama-irowomidiro-ri.

⁵⁰ Mo niramio, nio mo ro a-nimowapotai nimo durupi saiki ata ama-ipuse-ri. Nou maumo owamo ibo neio ro Godi edi kiwaboi tanaro maumo ro neito odoro-ri pua.

⁵¹ Owera neito ma-dirowidiro-rimo! Piro se na-owamotiti nedi owera ro, nio mo ro nou anama-imowapotai-ri, Godi ro na-gowapotai-die nimo aboto. Iana saiki nama-orobai-ri nimo arua ibose to anama-orowomidiro-ri. Nimo arua kimibiria urubia ta-gorowaburo-rimo iedi iana saiki ro namadi-orowateai-ri, kaupoti nimo atu se Godi ro ata sosoro anama-iwesegerai-ri.

⁵² Nimo ro humuko owera namadimi-irorowai-ri, nedi tanaro ro Godi ro hio ia to se ama-osioidiro-ri. Mabu humuko diamo amadi-utura-ri, taie kimibiria urubia kebase na-gorowaburo-rimo, neio orio keremiro mutu nato amadidimi-ireriburio-ri. Ina neio modobo pua ido pamo kowea aboto, womu tato womu tato keremiro to ama-irowomidirotiti-ri. Ibose nimo etio ra kimibiria urubia sopu duriomoro ato na-norowomidiro, nimo Godi ro

ata sosoro to anama-iwesegerai-ri.

⁵³ Nimo abora nedi durupi mutu na-norowomidiro, saiki ata karaburai ato amadimi-ipusiti-ri. Saiki ata kimibiria urubia durupi, Godi ubi ato nou ro ama-iwesegerai-ri, womu tato womu tato keremiro nou anamadimi-imidai-ri.

⁵⁴ Tarena Buka ower a keba se beda mino to giatiti-rimo, morobise to aise ama-ororosoidiro-ri, ibo *Pamo, oro pupuwo mo ro ta-nemowagare.*

⁵⁵ *Pamo, oro abora pupuwo boira? Pamo, oro edi temeteme ro na-orumio abora boira?*

⁵⁶ Ubauba tanaro urubia ro na-isioidiro-dumo, pamo pupuwo neio aboudo imadetiti. Ibose ubauba tanaro urubia ro na-isioidiro-dumo, neio edi pupuwo ro Godi edi sabi ro na-gaiwai-ro Mose aboto, pupuwo neio aboudo imadetiti-dumo.

⁵⁷ Godi aboto eso ower a se gi-aro-ri, nimo Abera Naramu Iesu Keriso ro pupuwo ti-niwaititi-die, pamo nimo ro bosoto kowororuwo aboto.

⁵⁸ Ina noudo ie, mo niramio, natonato babio, nio modobo pua ata ro kiwesegereamuti, gabo rido araubo mamoo, koko se dorowotoi. Nio modobo pua ata nakomu ata ro kimuruwouti. Sirio tau Abera Naramu edi woko ro nou se demesoidiro-mo. Mabu nio ro edi woko ro na-isioidiro-dumo, nio orowaguwoidiro-ri pua, meamea wisa sirio ioudo amadidimo-osuwoduti-ri.

16

Mani kidabuti Ierusarema kimibiria urubia

sapuwo to

¹ Abora nio mo ro a-nimowapotai mani kidabuti sapuwo to, Ierusarema sabowa ato Godi edi tarena urubia ro na-orowomidiro neio kiwarebai sapuwo to. Ina mo ro ibose Gereisia kimibiria urubia ta-nimowapotai idaibo tanaro isioidiro ri.

² Nedi owera ro ibo ie, sirio woiki gabogabo ato, nio erere se keba saiki ato, simara modobo ato, mani iopu ba-dimaremo-mo. Nio ro idaibo tanaro namadimi-isioidiro-ri, ina mo nio aboto korowateai ato, mani kidabuti tau ato nio ororosora-ri pua.

³ Mo nio aboto nama-orowateai-ri, nio ro beda dubu peteibi namadimi-ihodowa-ibiri mani kiwou aboto Ierusarema sabowa to, neibi mo ro kimabuti-bi sapuwo to peba titi se nama-imia-ibiri, taie nato anama-imeriai-biri peba titi mutu.

⁴ Modobo nama-oi-ri neibi mo mutu atu se namabimo-ou-ri Ierusarema sabowa to.

Pauro ibi misinare aimara beda mino to amabimo-oroho-ri

⁵ Mo nio aboto ido to anama-ou-ri, mabu mo ubi ie keba se Masedonia duriomoro ato edi sabowa ro na-iamo neio anama-iraturio-ri, ina nio aboto saro to anama-ou-ri.

⁶ Etu umoro ra mo nio abato egea mere se komidiro, o tuturu tau to komidiro, womu tato kukamo tau nama-oroporeai-ri. Mabu mo ubi ie mo nio ia ro kemeiriai ioudo ata moro to.

⁷ Nedi tau ro nato mo ubi tato ie nio abato egea mere se komidiro, ina nio nato kimeserai. Abera Naramu ubi ato, mo ubi ie nio mutu tuturu tau to komidiro.

⁸ Kaupoti mo Epesesi sabowa ato nato anama-omidiro-ri, womu tato Ohona Kiwoiriamuti soriomu saiki nama-orobai-ri.

⁹ Mabū mo ro edi mea woko ro na-nisioi dirotiti gabo ta-gorodobura-die, sirio meamea iopu isuwoduti ri. Kaupoti sirio urubia mo aboto auna serawo ie.

¹⁰ Timoti nio aboto nama-ou-ri, nu nio ro tere owaititi ate. Mo ro Abera Naramu woko beda sosoro nemesioi dirotiti, nou ro ibose to emesioi dirotiti.

¹¹ Ina noudo ie nu nio aboto namadi-ou-ri, modobo pua ubauba kimaragoidiro kiworohuti nou sapuwo to. Nu nio ro mo aboto miro mutu ba-dotiodorai-rimo. Nu mo ro ioudo namadi-emasebidiro-ri arua kimibiria borubi mutu namadidimo-ou-ri.

¹² Ina ata owera nou e, nimo ata kimibiria niama Aporosi nou sapuwo to ie. Aporosi auna se a-nemagege nou ro arua kimibiria borubi mutu nio iraturio ri. Kaupoti nu ubi tato goi nedi tau ro nato kou nio aboto. Nu a-gutura ibo, 'Mo ro mea tau nama-owea-ri, neio mo ro nato anama-iraturio-ri.'

Pauro iana owera ie

¹³ Nio kiraroweauti modobo ie, kimibiria maumo ato koko se ba-dorowotoi. Mibo tau ato aise iwagogorowado mamō, koko se gi-orowotoi-ri.

¹⁴ Nio ro beda tanaro kisioi diro ra, nirimagare aise gi-owawuti-ri.

¹⁵ Nio umoro ta-goi-rimo Akaia duriomoro ato Sitipani nu moto urubia mutu, neio keba urubia ie kimibiria urubia to kararapoi. Neibi durupi momuo se aise giaidodorowado-birimo, Godi edi

tarena urubia ro kiwarebai aboto. Niramio, nio mo ro a-nimagege

¹⁶ idaibo urubia ower aise gi-emedea-ri. Ina arua idaibo sosoro urubia pupuwo na-iasibowado-dumo nedi atu woko ro nato, neio ower aise gi-irowidiro-ri.

¹⁷ Mo kamade ta-noi Sitipani, Potunatusi, Akaikasi neibi neito na-gou-diebimo. Nio neito orowateai pua sekere, kaupoti nio bobo neibi ro girobai-bimo.

¹⁸ Mo kamade ie mabu mo nio mutu atu se niro turi kimaragoidiro mutu, neibi ro toutou nimowaititi-birimo. Idaibo sosoro urubia modobo ie neio aboto meamea tanaro se kisioidiro.

¹⁹ Iesu urubia Eisia duriomoro ato nato na-orowomidiro kamade ower aise imeiriai-dumo nio aboto imese. Akui ra Pirisira ra ibose Iesu urubia na-iradabutiti-dumo neitiro moto ato, neio ro auna kamade ower aise imeiriai-dumo nio aboto.

²⁰ Imese kimibiria naminiramio ro nato na-orowomidiro, nio aboto kamade ower aise imeiriai-dumo. Naminiramio kororowea ato kamade beda sosoro irimatiti-dumo, nou gi-iwawuti-ri borubi kimibiria urubia aboto.

²¹ *Mo Pauro ie, nedi kamade ower aise ro mo ro simara tu to nisioidiro nio aboto.*

²² *Abera Naramu etio ro nirimagare emati tato, neio Godi ro ubauba ba-miwai!*

²³ *Iesu Keriso wisa tato nirimagare nio aboto ba-miamotiti.*

²⁴ *Nio imese Korini kimibiria urubia Iesu aboto nou ro na-gidabuti, mo edi nirimagare ro nio aboto aise ba-mowamotiti.*

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4